

Hebreos

Bëngbe Bëtsá bëngaftaca tojoyebuambá, chabe Uaquiñáftaca

¹ Tempo, Bëngbe Bëtsá ba soye y ba soyëngaca bëngbe bëts taitángbioye tojanéyana, chë chabe juabna oyebuambnayëngaftaca. ² Pero quem tempo bëngaftaca tojoyebuambá, chabe Uaquiñá jíchmuase, bëngbioye cha chašúyanama. Bëngbe Bëtsá tojama, lempe ntšamo chabe soye yomncá, chabe Uaquiñabiamana chaotsemnana, y chábeyeca Bëngbe Bëtsá quem luare y nyetsca inyë luarënga tojama. ³ Cha endinyänýná Bëngbe Bëtsabe corente buashinýinýanana y uámanana, y cha endmëna cach Bëngbe Bëtsacá, y chábeñe bënga mondobena jinýama ntšamo Bëngbe Bëtsá yomncá. Chabe bëts obenánaca endútabna lempe ntšamo quem luarentše yobinýncá; cha tojayana y chca jtsemnana. Cha tojanóbana bëngbe bacna soyënga jabua-juánama, y chentsana Bëngbe Bëtsá tojaninýanýé cha puerte bëtsá y uamaná bëtsemnana, celoca játbemëse, Bëngbe Bëtsabe catšbioica, nyetscanga jt-samëndayama.

Bëngbe Bëtsabe Uaquiñá chë angelëngbiamana más bëtsá yomna

⁴ Y chca, Bëngbe Bëtsá tbojánbema chë angelëngbiamana más uamaná y obená, er Bëngbe Bëtsá tbojanbuajó canýe más uamana uabaina y chë angelëngbiamana canýe más uamana trabajo tbojanbonýé. ⁵ Ndegombre chca endmëna, er

Bëngbe Bëtsá ndocna te ndocna ángelbioye mëntsá tbonjaniyana, ntšamo chabe Uaquiñábioye tbonjaniyancá:

Aca atšbe Uaquiñá condmëna.

Mënté entšanga sënjinÿanÿé aca atšbe Uaquiñá comnama ca.

Ni ndocna angelbiama mëntsá tojánayana, ntšamo chabe Uaquiñabiama tojanayancá:

Atše canÿe taitá chabiama chántsemna,
y cha canÿe Uaquiñá atšbiama ca.

⁶ Quem Bëngbe Bëtsabe Uaquiñá endmëna nÿetscangbiama más uamaná. Chca Bëngbe Bëtsá tojánayana, chabe natsana Uaquiñá quem luaroye cháuashjanguama cha tojanma ora:

Bëngbe Bëtsabe nÿetsca angelënga cha chamotsatschuaná ca.

⁷ Y chabe angelëngbiama, mëntsá tojánayana:

Atše sëndama atšbe angelënga, chë atšbe buayinyayënga, mo binÿiëngcá chamotsemnama,
y chënga, atšbe oservénënga, mo iñëjëngcá ca.

⁸ Pero chabe Uaquiñabiama Bëngbe Bëtsá tojánayana:

Utabná, acbe amëndayana nÿetsca tescama echántsemna,

y aca nÿetsca soyënguiñe condbétsemandaye,
ntšamo tšabá yomncá jtsamëse.

⁹ Aca icontšena ntšamo tšabá yomncá nÿetsca soyënguiñe jtsamama, y sempre chca jtsamama tša icoboše,

pero nÿa tondayama cmondogustana bacna soyënga jtsamana, chë ndayá Bëngbe Bëtsá ndoñe yondboše soye;

chíyeca Bëngbe Bëtsá tcmojabocacá,

y tojama aca puerte oyejuayá chacotsemnama,
chë ínÿengbiamá más oyejuayá ca —Bëngbe Bëtsá
tojánayana.

10 Bëngbe Bëtsá mëntsánaca chabiamá tojánayana:
Utabná, quem luare jobojátšama ora, aca quem
luare tconjanma,
y lempe chë celoca yomna soyëngnaca.

11 Lempe chë soyënga nÿets tempo ndoñe
queochátsmëna;
aca nÿetsca tescama cochántsemna.
Lempe chë soyënga echanjopochóca, mo tojuatan-
guaná entšayacá.

12 Aca chë luarënga cochanjátrocaye, mo tsmëcá
cuafjabiamcá.
Chca, chë luarëngaca cochanjama, mo entšayá
tcojtenëjonëtse y tcojenotrocacá.

Pero aca nÿets tempo cach aca cochandesomñe,
y nÿets tempo vida cochandesóbomñe ca —cha
tojánayana.

13 Bëngbe Bëtsá ndocna te ndocna ángelbioye
mëntšá tbonjaniyana, ntšamo chabe Uaquiñábioye
tbojaniyancá:

Atšbe catšbioica cochtsetbemana,
acbe uayayënga acbe cucuatšične chamoquedama
atšbe obenánaca chjamëntscuana ca.

14 Ndegombre, nÿetsca angelënga espíritënga
mondmëna Bëngbe Bëtsá jasérviamá, ndëmuanÿënga
cha tojanichamó bënga jabújabuachama, chë
atsebácanënga mochtsemnëngbe tšabiamá.

2

*Canÿe bëts soye endmëna atsebácanënga jtsem-
nana*

1 Chíyeca, bēnga šontsamna sempre Bēngbe Bētsabe soyēnga jtsuenanana, chē bēnga tmonjouena soyēnga, chē tšabe benachentsana ndoñe chamondojuánama. 2 Ndayá Bēngbe Bētsá tempo angelēngaca entšanga tojanamēndacá, canye ndegombre soye endmēna, y entšanga entsamna chca jtsobedecénana; y chē bacna soye tmojanmēnga y ntšamo Bēngbe Bētsá tojanmandacá ndoñe tmonjanmēnga castigo tojanatšatá, chca tmojanma causa; y chca, 3 bēnga chca bacna soyēnga tmojtsamēse, ¿ntšamo mochjobenaye jtsejuabnayana Bēngbe Bētsá chama ndoñe šochanjacastigaye ca? Ndegombre cha chca echanjama, bēnga chábeñe ndoñe tmontsošbuáchese, chē bēts soye jēftsashjáchama, atsebácanēnga jtsemnana. Bēngbe Utabná chē natsaná yojtsemna nda entšanga tojanabuayená Bēngbe Bētsá entšanga yochjánatsebacama; y ínýnga bēnga šonjanabuayená cachcá ntšamo chábioye tmojanoyeunacá. 4 Y Bēngbe Bētsánaca tonjaninýanyé, ndayá chēnga tmojanabuayenacá ndegombre bétsemnana, chabe obenana jinýanýiyama soyēngaca, entšanga chamenjnaná soyēngaca, bēts soyēngaca, y entšanga chē Uámana Espíritu ainaniñe chamotsebomnana cha jtsamēse. Chca jamēse, cada ona chaotsobena jamama ntšamo Bēngbe Bētsá yobošcá.

Bēngbe Bētsá tojanma Jesucristo entšangcá chaotsemnana

5 Bēngbe Bētsá angelēnga ndoñe tonjubuáyana chamotsemándama ndayá quem luarentše yochtsemniñe, lempe mo tsmécá chaotsemnana

Bëngbe Bëtsá chaojama ora, chë ndayama mora bënga montsoyebuambná. ⁶ Chamna, ínÿoca Bëngbe Bëtsabe uabemana palabrënguiñe mëntsá endayana, ntšamo chábioye canÿa tbojaniancá tojánayana:

Entšanga ndoñe yapa uámanënga quemátsmëna, as ¿ndáyeca tša chëngbeñe cuanjésejuabnaye?

Chënga entšanga mondmëna. ¿Ndáyeca tša chënga cuanjésanÿena?

⁷ Aca tcojama entšá puerte uamaná chaotsemnama, y chë angelëngna nÿe batšatema chabiamama más uámanënga mondmëna.

Aca tcojama cha puerte uamaná y respeto merecido bomná chaotsemnama,

⁸ y cha chaotsemándama nÿetsca chë inÿe soyënguiñe, chë quem luarentše aca tcojamiñe —chiñe canÿa tojánayana.

Entšá lempe chaotsemándama Bëngbe Bëtsá tojanma ora, tondaye tonjánboshjona entšáftaca ndëmandana soye ca. Pero mëntscoñama ndoñe nÿa chca quemëntinÿe, chë entšá lempe ntšamo quem luarentše yomncá jtsemándayana. ⁹ Pero bënga mondëtatšëmbo y corente mondonÿá Jesús aíñe chca tojanmama. Bëngbe Bëtsá tojanma cha nduamaná chaotsemnama, mo canÿe entšacá, baseftayté chë angelëngbiamama más batšá uamaná. Bëngbe Bëtsá, entsangbe tšabiamama jtsejuabnayëse, yojánboše Jesús chaóbanama, corente jasúfriase; Bëngbe Bëtsá yojánboše cha chca chaomama, nÿets luarentša entsangbe tšabiamama. Y Jesús ya chca tojánmayeca, Bëngbe Bëtsá ya tojinÿanÿé cha puerte bëtsá y uamaná bëtsemnama.

10 Njetsca soyënga yobinÿna Bëngbe Bëtsabiana y chábeyeca. Tšabá enjamna, Bëngbe Bëtsá jamana Jesucristo chaotsemnama lempe ntšamo entšanga tmojtsajabotcá, nda chëngbe bacna soyënguentšana cháuatsebacama. Bëngbe Bëtsá chca tojanma, Jesús, chë entšanga atsebácanënga jtsemnama unachayá, chaosufrima jamëse, chca, ba entšanga celoca, mo chabe basengcá, cháftaca bëtsétsanga chamotsemnama.

11 Er Bëngbe Bëtsá cach Taitá njetscangbiana endmëna: Jesús, chë entšanga Bëngbe Bëtsábenga chamotsemnama iuamabiana, y chë entšanga chca chamojtsemnëngbiámnaca. Chíyeca Jesús, Bëngbe Bëtsabe Uaquiñá, ndoñe ntsëuatjana chëngbioye catšátanga ca jtsachembuanama.

12 Bëngbe Bëtsabe uabemana palabrënguifë Bëngbe Bëtsábioye cha mëntšá tbojaniana:

Atšbe uabentsëngbeñe acbiana
chanjóyebuambaye,
y jacántase cbochanjëtschuaye, ácbioye
adórayënguentše ca.

13 Y mëntšánaca cha Bëngbe Bëtsabiana tojánayana:

Atše atšbe Bëtsábeñe chantsošbuáchiye ca.

Y más chcoye mëntšá tojánayana:

Muentše Bëngbe Bëtsabe básengaftaca sëntsemna,
chë atšbe cucuatšifë tojábashëjuanënga, atše
jtsanÿenama ca.

14 Quem Bëngbe Bëtsabe básenga njetsca entšangcá mondmënayeca, Jesúsna canÿe entšá chëngcá tojanóbema. Cha chca tojanma, jóbane, chë entšanga jóbanama chaotsamnama obenana bomná Satanás, jayëñjanama. 15 Y

chca, cha tojama chë jóbanama y ndayá chentšana yochjopásama auatjënga ndoñe chamondëtsauatjama; chënga nyëts tempo corente ngménaca imnoyena, jóbanama auatja causa. ¹⁶ Er ndegombre, cha ndoñe tonjánabo chë angelënga jabújabuachama, ndayá chë Abrahámbentšana entšángbioye. ¹⁷ Y chama cha ibojamna jtsemnana nyëtsca soyënguiñe cachcá mo chabe uabentsëngcá, chë entšanga, chca, jobenayama jtsemnana chëngbiana mo bachnangbe canye más uámana amëndayacá, Bëngbe Bëtsá jtseimpadánama chëngbioye chëngbe bacna soyëngama cháuaperdonama, puerta lastemado mëná y sempre ntšamo Bëngbe Bëtsá tbojauyancá amá. Chca, cha jóbanëse jamama entšanga chamobenama perdonánënga jtsemnana, y chca, jobenayama Bëngbe Bëtsáftaca tšabá tempcá jtsemnëngama. ¹⁸ Y mora cha entsobena, ndëmuanýënga bacna soye jamama tojócochenguënga jujabuáchana; cha chca entsobena, er cachánaca tojansufrí, cha bacna soye chaomama Satanás tša yojtsentšena ora.

3

Cristo Moisesbiana más uamaná endmëna

¹ Chíyeca, Jesucrístbeyeca catšátanga, Bëngbe Bëtsábënga, ndëmuanýënga Bëngbe Bëtsá tojáchembo chabe entšanga chamotsemnana, corente Jesucrístbeñe šmochjésejuabnaye. Cha endmëna nda Bëngbe Bëtsá bëngbioye tbojanichmó, y nda bëngbiana yomna mo chë más uámana bachnangbe amëndayacá,

Bëngbe Bëtsábioye jtseimpadánama bacna soyëngama chašotsaperdonama. Cha chca endmëna chë bënga mondošbuaché soyënguiñe y chë mondbáyana ndegombre yomna ca soyënguiñe. ² Er Jesús nyets tempo tojanma ndayá chaotsamama Bëngbe Bëtsá tbojaniancá, Bëngbe Bëtsá, nda tbojanábuayana chca chaoservema, cachcá ntšamo Moisés tojanma ntšamo Bëngbe Bëtsá tbojanmandacá, chabe entšángbioye cháuaservema. ³ Canye yebna jebuaná chë yebnama más uamaná jtsemnana; cachcá Jesús, nda inétsama entšanga Bëngbe Bëtsábenga chamotsemnana, más jtsomerecénana Bëngbe Bëtsá cha puerta bëtsá y uamaná bëtsemnana cháuinñanyema, nye ntšamo Moisés, canya Bëngbe Bëtsabe entšanguentšá yojanomerecénama. ⁴ Ndëmuanye yébnënaca canye jebuaná jtsebomnana, pero Bëngbe Bëtsá endmëna nda tojanma lempe ntšamo yobinñncá. ⁵ Moisés yojtsama ndayá chaotsamama Bëngbe Bëtsá tbojanmandacá, tšabe oservenacá nyetsca Bëngbe Bëtsabe entšángbeñe, y yojamna canya corente tatsëmbuá ndayá más chcoye yochjanopásama, ndayá Bëngbe Bëtsá yochjánayanama. ⁶ Pero Cristo, ndayá Bëngbe Bëtsá tobošcá jamana, chë Bëngbe Bëtsabe entšángbeñe Uaquiñacá jtsemándayëse, ntšamo canye uaquiñá jtsemándayana ndayá nyetsca chabe pamíllanga tmojtsamiñe; cha, chë Uaquiñacá y chënga chë Bëngbe Bëtsabe pamillentšengcá. Bënga chë pamillentša entšanga jtsemnana, bënga chë ndayá tmošbuáchema bëts añémoca sempre tmojtsóyebuambnase, y

sempre Bëngbe Bëtsá tšabe soyënga bëngbiana yochjamama tmojtsobátmanëse, y bënga chca jtsebomnama puerte oyejuayënga tmojtsemnëse.

Chë jóchnama uámana luare Bëngbe Bëtsabe entšangbiana

⁷ Chcasna, ntšamo chë Uámana Espíritu Bëngbe Bëtsabe uabemana palabrénguiñe tojanayancá:

Mënté tšëngaftanga ndayá Bëngbe Bëtsá tojtsichamcá šmojouenëse,

⁸ ndoñe šmattsama, Bëngbe Bëtsabe buayenana soyënga tšëngaftangbe ainaniñe ndoñe chaondómashënguama,

mo chë entšanga ndoyena luaroca Moisésoftaca imojëftsemnëngcá, Bëngbe Bëtsabe contra nyetsca soyënguñe imojtsemna.

Chënga bëtscá bacna soyënga tmojanma, mo ndayá cuaftsamcá jinÿama ntsachetšá más muanjobenaye jamana y Bëngbe Bëtsá cabá uantado chëngaftaca tayojtsemnama.

⁹ Bëngbe Bëtsá tojánayana: “Chentše, tšëngaftangbe bëts taitanga bëtscá monjánama jinÿama ndayëntscoñe atše uantado chëngaftaca tsjamnama;

chca chënga tmonjanma, masque canta bnëtsana uatëntscuana chënga chentše tmonjáninÿe chë atše sënjánama bëts soyënga.

¹⁰ Chíyeca, atše chorsca entšángaftaca šonjánetna y sënjánayana:

‘Tšëngaftanga mora átšeftaca ndoñe quešmátajna, mo chë otšenënga tmojtsemnëngcá, y ndoñe šmonjábosena jtsiyenana ntšamo atše tsbošcá jtsamëse.’

11 Chíyeca, atše chěngaftaca etonaná sěnjánayana,
mo nda cuafjajuracá,

chěnga ndocna te mochjěftsashjache chě átseftaca
jóchnama uámana luaroye jashjanguama ca”
—cha tojánayana.

12 Jesucrístbeyeca catšátanga, yejuana
šmochtsantješna ndocná tšěngaftanguentšá
chaondětsebomna canye ainana bětscá
bacna juabněgaca, y chě causa chaotsemna
Běngbe Bětšábeñe ndošbuachiyá, y Běngbe
Bětšábentšana, chě sempre iuetsemnábentšana
chaotsojuánañe.

13 Chamna, nyetscanga
añemo šmochtsatenatšetnaye cada te, chě
běnga imobena Běngbe Bětšá joyeunayama
tempo imoyeněntscuana, chě Běngbe Bětšabe
uabemana palabrěnguiñe “měnté ca”
uabaina tempo. Chca cmontsamna, ndocná
tšěngaftanguentšá chaondětsamama, Běngbe
Bětšabe buayenana soyěnga ainaniñe ndoñe
más chaondómashěnguama, bacna soyěnga
jamama juabněgaca ingñená. 14 Er, ndayá
Jesús chabe aměndayoca yobomněntšana běnga
chamóyěngacñamna, běnga šontsamna sempre
ainaniñe corente jtsetatšěmbuana Jesusbe soyěnga
ndegombre soyěnga bětsemnama, ntšamo běnga
chábeñe jtšošbuáchiyama tmonjanontsé ora
monjanamcá.

15 Ntšamo Běngbe Bětšabe uabemana
palabrěnguiñe endayancá:

Měnté tšěngaftanga ntšamo Běngbe Bětšá
tojtsichamcá šmojoueněse,

ndoñe šmattsama, Bëngbe Bëtsabe
 buayenana soyënga ainaniñe ndoñe
 chaondómashënguama,

mo chë entsanga ndoyena luaroca Moisésoftaca
 imojëftsemnëngcá, Bëngbe Bëtsabe contra
 nyetsca soyënguiñe imojtsemna ca.

¹⁶ ¿Y ndëmuanyënga imojamna, chë Bëngbe
 Bëtsá tojanëyancá tmojanuenentsana, nyetsca
 soyënguiñe chabe contra imojtsanmëna? Co
 chë Moisésbeyeca Egiptocana tmojánbocanënga.

¹⁷ ¿Y ndëmuanyëngaftaca Bëngbe Bëtsá etonaná
 canta bnëtsana uatëntscuana yojtsemna? Co chë
 bacna soyënga tmojanmëngaftaca, ndëmuanyënga
 entsanga ndoyena luaroca tmojanóbana y chëngbe
 cuerpo chentše tojanoquedá. ¹⁸ ¿Y ndëmuanyënga
 tojanëyana, mo nda cuafjajuracá, chënga
 ndocna te mochjëftsanashjache chë cháftaca
 jóchnama uámana luaroye jashjanguama ca? Co
 chë ndëmuanyënga ntšamo cha tojanmandacá
 ndoñe tmonjanmënga. ¹⁹ Y ndegombre,

bënga montsobena jinyama chënga ndoñe
 tmonjëftsanashjache chë cháftaca jóchnama
 uámana luaroye jashjanguama, Bëngbe Bëtsábeñe
 ndoñe imontsošbuaché causa.

4

¹ Chíyeca, bënga chë Bëngbe Bëtsáftaca jóchnama
 uámana luare jashjáchama cabá imobenëntscuana,
 ntšamo cha šojanašebuachenacá cachcá
 mëntscoñama iuétsemna, puerta cuedado mochtse-
 bomna, nderado ndánaca tšëngaftanguentsá ndoñe
 nanjobenaye chca jashjáchama. ² Er bëngnaca chë
 tšabe noticiënga tmonjouena, cachcá chë Bëngbe

Bëtsabe buayenana soyënga chëngbe ainaniñe ndoñe chaondómashënguama tmojanmëngcá; pero chënga chë buayenana soyënga tmojanuena ora, ndocna tšabe soye chëngbeñe tonjanopasá, er chca tmojanuena ora, chë palabrënguiñe ndoñe montsanošbuaché. ³ Pero bënga, chë Jesucristbeñe tmojošbuachengna, mochanjobenaye chë jóchnama uámana luaroye jashjanguama, chë ndayama Bëngbe Bëtsá tojánayana, chë tempo chábioye chca tmojtsanábotengbiamá cha mëntsá tojánayana ora:

Chíyeca, atše chëngaftaca etonaná, sënjánayana mo nda cuafjajuracá,

ndegombre chënga ndoñe mochjéftsashjache chë jóchnama uámana luaroye jashjanguama ca.

Pero cha chabe trabajo tojanpochocá, quem luare tojanma ora; ⁴ er Bëngbe Bëtsabe uabemana palabrënguiñe cánÿentše mëntsá endayana, chë canÿsëfta tianoye ndayá cha tojanmama:

Bëngbe Bëtsá nÿetsca trabajëngama tonjanochná chë canÿsëfta tianoye ca.

⁵ Y cachentše Bëngbe Bëtsabe uabemana palabrënguiñe endayana, chë tempo chábioye chca tmojtsanábotengbiamá:

Chënga ndocna te quemocháisashjache chë átseftaca jóchnama uámana luaroye jashjanguama ca.

⁶ Chë entsanga monjamna chë natsanënga chë tšabe noticiënga jouenama, pero chë Bëngbe Bëtsáftaca jóchnama uámana luare ndoñe tmonjéftsashjache, ntšamo cha inabošcá chënga ndoñe tmonjanma causa. Chcasna, cabá

ndegombre endëtsomñe báseftanga, chë Bëngbe Bëtsá tojánayana soyënguiñe tmojtsošbuáchenga, mochjëftsashjache chë Bëngbe Bëtsáftaca jóchnama uámana luaroye jashjanguama. ⁷ Chë entsanga ndoyena luaroca, Bëngbe Bëtsá entsanga tojánachembo chë cháftaca jóchnama uámana luaroye chámuamashjnama, y chentsana ba uatëse cha cachiñe canye tempo tojuinýnaná, chora entsanga chamobenama chë cháftaca jóchnama uámana luaroye jashjajnama, chë cha “mënté ca” tojanabaye tempo. Cha chca tojanma Davidbiajana jóyebuambayëse, David Bëngbe Bëtsabe uabemana palabrënguiñe mëntsá tojánayana ora:

Mënté tsëngaftanga, ndayá Bëngbe Bëtsá
tojtsichamcá šmojouenëse,

ndoñe šmattsama, Bëngbe Bëtsabe
buayenana soyënga ainaniñe ndoñe
chaondómashënguama ca.

⁸ Josué, Israeloca entsanga Canaán fshantsëngoye yojtsënachaye ora, chë Bëngbe Bëtsáftaca jóchnama uámana luare jtsebomnama cha choca matëñjanmëse, Bëngbe Bëtsá bayté chentsana, David yojëftsiyena ora, inye tempuama ndoñe matëñjanoyebuambá, chë ndaye ora entsanga muanjobenaye chë cháftaca jóchnama uámana luare jashjáchama. ⁹ Y chca, cabá endmëna canye uámana luare ndayentse Bëngbe Bëtsabe entsanga mochjobenaye cháftaca jóchnama, ntšamo Bëngbe Bëtsá tojanochnacá, chë quem luare jamama nyetsca trabajënga tojanpochocá ora; ¹⁰ er nda tojashjache chë Bëngbe Bëtsáftaca

jóchnama uámana luaroye jashjanguama, cha jóchnana chë Bëngbe Bëtsá tbojanmandá jamama trabajëngama, ntšamo Bëngbe Bëtsá tojanochnacá, chë quem luare jamama nyetsca trabajënga tojanpochocá ora. ¹¹ Chíyeca, šontsamna lempe ntšamo tmojobenacá jamana chë jóchnama uámana luare jëftsashjáchama, ntšamo chë Bëngbe Bëtsábioye ndoñe tmonjanoyeunangcá ndocná chaondétsamama, y chë causa chënga chë soye ndoñe tmonjëftsashjache.

¹² Er Bëngbe Bëtsabe palabra endmëna mo canye aina soycá, nyets tempo entšángbioye ndayánaca jtsabuátambayana, y bëtscá jamana corente obenánaca, y ndocna te nye bonamente chë palabra jóyebuambayana. Mo chë nyets utoicajana más efšana espadëjaquécá, jobenayana puerte jashenoye jatëtšana canye cuerpo tcojatëtše ora, cachcá y cabá puerte más Bëngbe Bëtsabe palábraca, cha bënga jinÿanÿiyana ntšamo bënga nye bëngbe ainaniñe tmojtsejuabná y tmojtsebošcá, y chë ndocnábioye tmonjinÿinÿé sóynaca; y chë palábraca cha endobena jáuyanana ntšamo bënga tmojajuabó y tmojabošencá aíñe o ndoñe tšabá bëtsemnana. ¹³ Ntšamo Bëngbe Bëtsá tojamentšana tondaye quenátopodena chabiamana iytëmenana jtsemnana. Bëngbe Bëtsá lempe bominye iuetsequëcñá, y nyetsca soyëngama y nyetscangbiamana lempe yotátšëmbo; Bëngbe Bëtsá, ndábioye šojtsamna sempre jojuana ndáyeca canye soye chca tmojamama.

Jesús endmëna chë más uámana bachnangbe bëts amëndayá

14 Jesús, Bëngbe Bëtsabe Uaquiñá celoye tojámashëngo, y mora cha endmëna nda chabe delante sempre bëngbiana ibuétseimpadana, mo chë bachnangbe canÿe más uámana amëndayacá. Chíyeca, bënga šontsamna sempre chábeñe jtsošbuáchiyana, ntšamo bëngbe ndegombre ošbuáchiyana yomncá, chë ndayama bënga nÿetsca entšángbeñe tmojayana. 15 Er chë bëngbiana impadaná, mo bachnangbe canÿe más uámana bëngbe amëndayacá, Jesús, yobena bëngbiana jóngmiana, bënga inÿe ora ndoñe yapa obenana tmontsebmna ora, tšabe soye o ndaye sóynaca jamama. Chca endmëna, er Satanás tša yojtsentšena Jesúsbioye ba juabnënga chabotsontšáshjauanama, jayënjanama bacna soye chaomama, nÿetsca juabnënga ntšamo bëngnaca mondbetsebmncá, pero Jesús ndocna te ndocna bacna soye tonjëftsema. 16 As, ndauatjca Bëngbe Bëtsá mochjótšëmbona, mo chábioye cuaftsobecocnangcá; cha canÿe uámana tbemaniñe yojtsetbemana canÿe bëts reycá; chca mochjama, bënga chášualastemama, y bëngbiana tšabe juabna jtsebmne, chašújabuachama bënga chca chašojtséjaboto ora.

5

1 Ndëmuanÿe bachnangbe más uámana amëndayánaca jtsemnana entšanguentšana bocacaná, y uabuayaná chëngbe cuenta Bëngbe Bëtsá jaserviama, chábioye juatšëmbonama y bayënga jobáyama Bëngbe Bëtsá jëtschuayama, chca, Bëngbe Bëtsá chë bacna soyënga entšanga tmojamama cháuperdonama. 2 Chë bachna

jtso benana jóngmiana, chë bacna soyënga amëngbiana chama ntsetatsëmbcá, y chë bacna soyënga jamama ingñénënga imomnënga, mo otshëngcá imomnëngbiana, er cachánaca inye ora ndoñe yapa obenana ntsebomnana, chë bacna soyënga jamama juabnëngama jtocochbuáchama. ³Y chiyeca cha jtsemnana bayënga jobáyama Bëngbe Bëtsá juatsëmbonama, ndoñe nye entsángbioye bacna soyëngama cháuperdonama, ndayá chábioye chaboperdonámnaca. ⁴Ndocná quenátobena cachá quem uámana trabajo jentsetayana, bachnangbe más uámana amëndayá jtsemnana; cha jtsemnana, Bëngbe Bëtsábeyeca uabuayaná chca uámana trabajo jamama, ntšamo ndegombre Aarónoftaca tempo cha tojanmcá. ⁵Cachcá, Cristo ndoñe cachá tonjanenábuayana jtsemnana chë Bëngbe Bëtsabe delante sempre bëngbiana impadaná, mo bachnangbe canye más uámana amëndayacá, ndayá Bëngbe Bëtsá tbojanábuayana chë uámana trabajo jtsebomnana. Cha endmëna nda Jesúsbioye mëntsá tbojaniyana:

Aca atšbe Uaquiñá condmëna.

Mënté entsanga sënjinyanýé aca atšbe Uaquiñá comnama ca.

⁶Y inyocnaca, Bëngbe Bëtsabe uabemana palabrenguiñe mëntsá tbojaniyana:

Aca nyetsca tescama canye bachna condmëna, canye bëts bachna ntšamo Melquisedec yojamncá ca.

⁷Jesús quem luarentše yojëftsiyenëntscuana, cha juayebuáchëse y shëchbuíyeca Bëngbe Bëtsáftaca ibnéncuentaye y ibnaimpadana, cha chë jobanámentsana jatsbocama yojanobená; y Jesús

ntšamo Běngbe Bětsá yojanboščá tojánmayeca y tša respeto chabiana bómnyeca, chábioye tbojanoyeuná. ⁸ Chca, Cristo masque Běngbe Bětsabe Uaquiñá inamna, jasúfriase tojanábouinýe ntšamo jamana ndayá Běngbe Bětsá tojtseboščá. ⁹ Chca, Běngbe Bětsá chábioye tbojánbema lempe ntšamo entšanga tmojtsajabotcá, nda chěngbe bacna soyěngama cháuatsebacama; chentšana cha, Cristo, tojanma lempe ntšamo yojaniytcá, nýetscanga chě entšanga chábioye imojáněyeunaněnga chamotsobenama nýetsca tescama atsebácaněnga jtsemnama; ¹⁰ y Běngbe Bětsá tbojanábuayana, chě chabe delante sempre běngbiana impadaná, mo bachnangbe canýe más uámana aměndayacá chaotsemnama, canýe běts bachna ntšamo Melquisedec yojamncá.

Resjo endměna, ošbuáchiyana jtsajbanana

¹¹ Bětscá entsemna quem palabrama jóyebuambayama, pero chě soyěnga jayanama ntšamo tsěngaftanga catafjosertaycá, ndoñe paselo quenátsměna, er tsěngaftangna nýa uenana Běngbe Bětsabe soyěngama jósertana. ¹² Tsěngaftanga ya bayté Jesucristbe soyěngama šmotátšěmboyecca, tsěngaftanga cmontsamna ya jtsobenana ínýengbioye chě soyěnga jtsabuátambayana; pero tsěngaftanga cmontsějaboto ndánaca Běngbe Bětsabe soyěngama cachiñe chacmětětabuayená, chě jtsošbuáchiyama šmojontsé ora natsana jshauatsjínýana soyěngama. Y chca, tsěngaftanga šmojobiama mo šešonateměngcá, jtsějabótana létšiyे jofšiyana y ndoñe jobenayana jasana chě jabmuánama ndoñe paselo tontsemna

soyënga. ¹³ Chë nyetsca soyënguiñe ntšamo tšabá yomncá jtsamama buatëmbana soyënga ndoñe tontsabuatmá cha, jtsemnana mo canye šešonatemcá, nda vida jtsebomnana nýe létšiye jtseftmanëse. ¹⁴ Pero chë tmojtsobena jajuaboyana y jtsetatšëmbuana ndayá tšabá yomna o ndayá ndoñe tšabá jamama, chca jtsamëse tmoyenamna, chënga jtsemnana mo bëtsëtsangcá, ndëmuanýenga ndayánaca jasana, chë ndoñe paselo jabmuánama soyëngnaca.

6

¹ Chcasna, bënga šontsamna jtsajbanana nýe jésebošana jtsatsjédayana Cristbe buatëmbana soyënga, chë bënga chábeñe jtsošbuáchiyama tmojanontsé ora tmojanatsjinýe soyënga, y šontsamna jtsatsjédayana chabiamana nýetsca soyënga, más totcá josértama yomna soyënga. Chca, bënga mochántsemna mo chë bëtsëtsangcá, ndayánaca jtsesayana. Ndoñe más nýe chë natsana buatëmbana soyëngama mattsatsjédaye, mo chë ndayá yomna bacna soyënga jtsamana y chë bënga ndoñe vida ntsebomnana junatsana soyënga amana jtsajbanana, y chë tšabe benache jtishachana; o ntšamo Bëngbe Bëtsábeñe jtsošbuáchiyana; ² chë juabáyana ndayá yomna; chë ínýabe bestšašiñe cucuatšënga jacjayana Bëngbe Bëtsábioye chabiamana jaimpádama; chë obanënga jtayenama Bëngbe Bëtsá yochjamama; y mocna ora ntšamo entšanga tmojamama Bëngbe Bëtsá yochjayanama, chënga chë nýetsca tescama yomna tšabe vida chamotsebomnana o nýetsca tescama castigánënga chamotsemnana. ³ Y bënga

chca fchanjama, chë más totcá yomna josértama soyënga jtsabuátambayana, Bëngbe Bëtsá chca chašojálesenciase.

⁴ Ndëmuanÿenga, canÿe ya chë Bëngbe Bëtsabe ndegombre soyënga tmojanóyëngacñe, y chë Bëngbe Bëtsabe ba tšabe soyëngnaca, chábenga bétsemnama, y chë Uámana Espíritu chëngbe ainaniñe chaotsemándama imobomna, ⁵ y chë Bëngbe Bëtsá ntšamo tojašebuachenacá sempre inétsamama tmojinÿe, y ndëmuanÿenga tmojáninÿe Cristo jtsamana bëts soyënga chabe bëts obenánaca, chë ndaye obenánaca cha puerte bëts soyënga yochjama cha quem luaroye yochjésabo ora, ⁶ chënga Jesucristbeñe ošbuáchiyana lempe tmojtsajbanase, tondaye quenátsmëna ndayá jamama cachiñe Bëngbe Bëtsábioye jtobéconama; er Bëngbe Bëtsabe Uaquiñá chca stëtšoye jaquédana, yjtsemnana mo Bëngbe Bëtsabe Uaquiñábioye cachiñe chënga tmojtsecrucificacá, y entšanga cachiñe cha chamotsáboyejuanama chënga cuafjamcá. ⁷ Smochjinÿe: fshantse jamana chë ba uaftënga chiñe chaómashënguama, y chë chiñe trabájayëngbiamama bëtscá jaja sananga tojóboçnëse, Bëngbe Bëtsá jamana, chë fshantsentšana bëtscá tšabe soyënga entšangbiamama chaotsebínÿnama. ⁸ Pero nÿe uchmašëshangá y matënga uchmëfjangaca chiñe tojuábocnëse, chë fshantse tondaye ntsámanana; y nderado Bëngbe Bëtsá nanjama chiñe ndocna tšabe mata chaonduábocnama, y cabana, entšanga chiñe mochantsashaniñá. Cachcá, chë ošbuáchiyana tmojtsajbananga castigánënga

mochántsemna.

Bëngbe Bëtsábeñe sempre chamotsobátmanama y ainaniñe bëtská añemo chamotsebomnama

⁹ Pero masque chca montsoyebuambná, atšbe bonshánënga, bënga tšabá fsëndëtatšëmbo tšëngaftangbeñe chë más tšabe soyënga echántsemna, chë atsbocaná jtsemnama tojtsá cha yobomna soyënga. ¹⁰ Er Bëngbe Bëtsá

sempre ntšamo tšabá yomncá nyetsca soyënguiñe jtsamana, cha ndegombre echántsejuabnaye ndayá tšëngaftanga šmojamama, y chë chabiamama šmojinýinýé bonshánama, chabe entšángbioye jtsëjabuáchanëse, ntšamo mórncá šmojtsama. ¹¹ Pero bënga fsëntseboše,

cada ona tšëngaftanguentsá, nyets tempo y Jesús chaójësabëntscuana chaotsinýanýná corente yoboše chca jtsamama, Bëngbe Bëtsábeñe chca jtsošbuáchiyëse, chábeñe sempre chašmotsobátmanama, tšëngaftangbe tšabiamama cha chaomama. ¹² Ndoñe queftsátsboše tšëngaftanga oyënjayënga chašmotsobiamama chë Bëngbe Bëtsá tcmojabanýé trabajo jtsamama, ndayá Jesucristbeñe ošbuáchiyana bomnëngcá y padecena soyënguiñe uantado mënëngcá šmochtsama. Chca, chënga mochanjóyëngacñe ndayá Bëngbe Bëtsá jatsatayama tojašebuachenacá, chabe entsanga bëtsemnama.

¹³ Bëngbe Bëtsá Abrahámbioye tbojanšbuachená ora, chca tbojanianyana cachabe uabaina jayanëse, er inýa chabiamama más uamaná ndoñe yontsemna ndabiamama jajúrama, ntšamo tbojanšbuachenacá ndegombre chaotsemnama; ¹⁴ cha mëntšá tbojanšbuachená: “Aíñe, atše chanjama aca

bëtská tšabe bendicionënga chacotsebomnama, y chanjama acbentša pamillentšana mallajta entšanga chamotsemnama ca.” ¹⁵ Y chca, Abraham Bëngbe Bëtsábeñe jtsošbuáchiyëse, puerte uantadiñe yojanobátmana ntšamo tbojanšbuachenacá Bëngbe Bëtsá yochjanmama, y pronto chca tojanóyëngacñe.

¹⁶ Entšanga tmojajurá ora, chca jamana chëngbiamá canye puerte más uámanabe uabaina jayanëse, y chca chëngbiamá más uamanabiamá tmojajurá ora, jtsayanana ntšamo tmojašbuachenacá pronto mochjamama, y chcasna, chama ya ndoñe más ntjatenátsëtsnayana. ¹⁷ Y chca, Bëngbe Bëtsá tojánbošena botamana jinÿanÿiyana, ntšamo cha tojanašebuachenacá mochjanoyëngacñëngbioye, ntšamo tojanašebuachenacá cha ndegombre yochjanmama, y ndocna te chë ntšamo jamama yojanjuabnacá yochjantrócama. Chíyeca, botamana tojaninÿanÿé cha chca yochjanmana, cachabiamá jajúrase, chë ntšamo tojanašebuachenacá yochjanmama ndegombre bëtsemnama. ¹⁸ Bëngbe Bëtsabe šbuachenana soye y chama jinÿanÿiyama ntšamo tojanayancá, ntšamo tojanašebuachenacá ndegombre yochjamnama, chë uta soye ndocná ntsobenana jatrócama; y chca tojayana ora, ndoñe ntsopodénana Bëngbe Bëtsá chaobená jobostérama. Y chca, chë uta soyama, bënga bëtská añemo ainaniñe jóyëngacñana, bënga chë Bëngbe Bëtsábioye tmojobéconanga, cha chásuatsebacama y chašotsanÿenama, mo canye bëts resjuentsána tmojtsachetëngcá,

ntšamo chentšana atsebácanënga jtsemnama cuaftsenguacá. Bëngbe Bëtsá šojáuyana bënga imojtsobena chábeñe jtsobátmanama ca, y bëts añémoca chábeñe jtsošbuáchiyëse, cha yejuana šochtsanÿenama mondobátmana. ¹⁹ Mo ntšamo chë bėjaye asentoca cuedádoca tcojajajo anclama, chë barcuñe enjaquenënga tšabá jtsetatsëmbuana chë barco ndoñe yochántsashatiyiyname, cachcá bëngnaca, Bëngbe Bëtsábeñe imóbatmanama, montsobena ainanoca jtsetatsëmbuana lempe tšabá yotsomñama. Bënga Jesucristbeñe mondobátmana, y Bëngbe Bëtsá yojtsemnoye celoca cha tojámashëngo y chabe delante entsemna mo chë bachnangbe más uámana amëndayacá. Chana jamashënguana chë Bëngbe Bëtsabe bëts yebnoca, “chë más uámana ca” uabaina luaroye, entšëjua ujonÿana stëtsoica, Bëngbe Bëtsabe delante jtsemnama, ²⁰ ndayentše Jesús celoca, Bëngbe Bëtsabe delante tojámashëngo bëngbe tšabiamama soyënga jamama, bëngnaca chamobenama chabe delante jamashënguama; chca, Jesús tojanóbema chë bachnangbe más uámana amëndayá nÿetsca tescama, canÿe bëts bachna ntšamo Melquisedec yojamncá.

7

Jesús, canÿe bëts bachna ntšamo Melquisedec yojamncá

¹ Quem Melquisedec yojamna Salem puebloca rey y bachna chë celoca Bëngbe Bëtsabiamama; Bëngbe Bëtsá, chë nÿetscangbiamama más uamaná. Abraham chë reyënga y chëngbe

soldadëngaftaca imojentsjaná y tojanayënjana chentšana yojtsatabó ora, Melquisedec tojánbocna cha jajébenguama, y chora Bëngbe Bëtsábioye tbojanimpadá, Abraham bëtscá tšabe bendicionënga chaotsebomnama chaomama. ² Chora Abraham chábioye tbojanatšetá, chë reyëngaftaca imojentsjaná ora, lempe tojanosháchiñentšana, bnëtsanentšana canye soye. Chë palabra Melquisedec endayana “nyetsca soyënguiñe tšabá ama rey ca”; y chánaca yojamna Salem puebloca rey, y chca endayana “nyetscanga natjëmbana chamotsiyenama ama rey ca”. ³ Chabe pamíllangbiana tondaye quenatótatsëmbo; chca cha endmëna mo ni taitá ni mamá ndoñe endbomnacá, ni bëts taitanga. Tondaye quenatótatsëmbo ntseco tojanonynama, ni ntseco tojanóbanama; chca, inye soyënguiñe cha yojamna mo Bëngbe Bëtsabe Uaquiñacá, y endmëna mo nyetsca tescama bachna cuaftsemncá.

⁴ Y mora, šmochjájuaboye tša uamaná Melquisedec inamnana, er bëngbe tempsca uamana bëts taitá Abraham chábioye tbojanatšetá, chë reyëngaftaca imojentsjaná ora lempe tojanosháchiñentšana bnëtsanentšana canye soye. ⁵ Ntšamo Moisesbe leyíñe endëmandacá, chë bachnangbe más uamana amëndayá Leví, Aarónënaca ca uabainabe pamillentšana tmomna bachnanga, jtsamnana chë Israeloca entsángbioye nyetsca chë tmobomna soyënguentšana bnëtsanentšana canye soye jtsayëngacayana; y chca jtsamnana masque chë entsanga cachëngbe pamillentšënga tmomna y Abrahámbentšana

pamillentšəgnaca. ⁶ Pero Melquisedec, masque Aaronbe pamillentšá ndoñe yonjamna, Abraham, chē ntšamo Bēngbe Bētsá tbojanšbuachenacá tojanóyēngacñabentšana, cha tojanóyēngacñe n̄yetsca soyēnguentšana bnētsanentšana can̄ye soye, y Bēngbe Bētsábioye tbojanimpadá, Abraham bētscá tšabe bendicionēnga chaotsebomnama chaomama. ⁷ Y ndocná quenátobena jayanama ndoñe ndegombre yondmēna ca, chē Bēngbe Bētsábioye impadaná ín̄yabiamama tšabe soyēnga chaomama, más uamaná inésemna chē chca tojóyēngacñabiamama, in̄ya chabiamama Bēngbe Bētsábioye tbojaimpadá ora. ⁸ Quem tempo, bachnanga mochjōbanēnga, entšángbioye jtsayēngacayana n̄yetsca chē tmobomna soyēnguentšana bnētsanentšana can̄ye soye, pero chē Bēngbe Bētsabe uabemana palabra, Melquisedecbiama endoyebuambná cha mo can̄ya cabá ainá totsomñcá. ⁹ Y bēnga montsobena jayanama, Abraham Melquisedécbioye chē n̄yetsca soyēnguentšana bnētsanentšana can̄ye soye tbojanoyé ora, yojamna mo Leví, chē n̄yetscángbioye n̄yetsca soyēnguentšana bnētsanentšana can̄ye soye ayēngacayá, Melquisedécbioye chca cuaftopagacá; ¹⁰ er cha Abrahambe pamillentšá inamna. Melquisedec yojtsabó ora y chábioye chē lempe tojanosháchiñentšana bnētsanentšana can̄ye soye Abraham tbojanatšetá ora, yojamna mo n̄yetscanga, chē Abrahámabentšana entšanga más chcoye mochtsaniyenēnga, chēngnaca chē bnētsanentšana can̄ye soye cuafjajajocá,

masque Abraham chca tojanma ora, Leví y chë Abrahám bentsana inye entsanga cabá ndoñe tmonjanonýná.

¹¹ Israeloca entsanga Moisesbe ley tmojanáyëngaca, chë bëts taitá Levibe pamillentšënga bachnanga imojamnënga Bëngbe Bëtsá imojtseservena ora, y chënga monjamna Aarónbentsana entsanga. Ntšamo chë leyiñe yomandancá imojánamënga perdonánënga jtsemnama y Bëngbe Bëtsabe bominyiñe tšábënga jtsemnama quem bachnanga jamama matmëñjanobenase, ndoñe manjanëyta Bëngbe Bëtsá inye bachna chabuatschembuama, nda ndoñe yonjamna mo chë bëts bachna Aaroncá, ndayá ntšamo chë bëts bachna Melquisedec yojamncá.

¹² Er, canye bachnanga Bëngbe Bëtsá bioye jtseservénama tmojaybaná y inye bachnanga chá bioye jaserviama tmojatontsé ora, jtseytana chë natsana bachnanga imojanoserverna ora mándaye leyëngnaca jtsetrócama.

¹³ Bëngbe Utabná, ndabiama quem soyënga jtsóyebuambnayana, ndoñe Aaronbe pamillentšá quenjatsmëna, ndayá inye pamillentšá, y quem pamillentša entsanga ndocna te bachnangcá Bëngbe Bëtsá tmonjanservé, chë altar ndirichiñe Bëngbe Bëtsabe bëts yebnoca. ¹⁴ Er nyetscanga mondëtatšëmbo Bëngbe Utabná Judabe pamillentšana bëtsemnama, y chë pamíllama Moisés ndocá tonjánayana, Bëngbe Bëtsá mo bachnangcá chënga jtseservénama.

¹⁵ Y ntšamo tmojayancá montsobena más tšabá josértana, er chë tsëm bachna Cristo yojamna canya mo Melquisedec yojamncá.

16 Cha bachna yojamna, ndoñe chë bachnanga chabe pamillentšana jabocanama yojánamnama canye ley tojánayanayeca, ndayá nyetsca tescama jëftsiyenama cha inobénayeca. 17 Er mëntśá endmëna, ndayá Bëngbe Bëtsá chabiamama tojánayana:

Aca bachna nyetsca tescama condmëna,

canye bëts bachna ntšamo Melquisedec yojamncá ca.

18 Cha tojánabo ora, Bëngbe Bëtsá tojanma chë nda bachna jtsemnama y ntšamo joserviama mandënga chaotsopochocama, er chë mandënga ndoñe ntjobenayana entšanga jujabuáchama atsebácanënga jtsemnama, y chca, chëngbiama ndoñe bëtsá yonjanoserverna. 19 Er Moisesbe léyeca, entšanga ndoñe tmonjanobená Bëngbe Bëtsabe bominyiñe tśábenga jtsemnama, pero mora chama canye corente más uámana soye montsebomna: Jesucristbeñe jtsošbuáchiyëse, chábeñe montsobátmana Bëngbe Bëtsáftaca tśábenga chásuabiamama, y chca, Bëngbe Bëtsábioye bënga jtobéconama.

20 Y Bëngbe Bëtsá lempe chca tojanma, cachabiamama jajúrase, lempe ntšamo cha tojanayancá ndegombre chaotsemnama. Chë inye bachnanga, chë Aaronbe pamillentšëngbioye tmojanëbuáyana ora, Bëngbe Bëtsá ndoñe chca tonjánayana, 21 pero mo bachnëcá chaoservema Bëngbe Utabnábioye tbojanábuayana ora aíñe; cach Bëngbe Bëtsabiamama jajúrase, Bëngbe Utabná canye bachna yochtsemnaca tojánayana. Ntšamo Bëngbe Bëtsabe uabemana palabrënguiñe endayancá:

Bëngbe Utabná Bëngbe Bëtsá, Jesucrístbioye tbo-
 janiyana, cachabiana jajúrase, ntšamo to-
 janayancá ndegombre chaotsemnama,
 y juabna ndoñe ntjatrócama:

“Aca bachna nÿetsca tescama condmëna ca.”

²² Bëngbe Bëtsá chca tojánayanama, Jesúsbeyeca
 bënga corente mondëtatšëmbo, ndayá Bëngbe
 Bëtsá bëngbiana jamama tojanašebuachenacá,
 chë Jesúbioye bëngbe bachna chaotsemnama
 juabuáyanana, más tšabá yojtsemna chë
 ndayá tempo cha chabe entšangbiana
 tojanašebuachená soyama. ²³ Chë inÿe
 bachnanga banga imojamna, er ndocná
 yonjanobena Bëngbe Bëtsábioye nÿetsca
 tescama chca jtseservénana; cada ona básefta
 uatëngama tojëftsanoservé, tojanóbana y ínÿabioye
 chë trabajo jatontšabuáchana. ²⁴ Pero
 Jesús ndocna te ntjobanámayecna, cha mo
 bachnëcá Bëngbe Bëtsábioye nÿetsca tescama
 bochjëftsesevena, y ndocna te chabe trabajo
 ínÿabioye bochanjëftsínÿinÿiye, chë inÿa cachcá
 jtsamama chauatontšema. ²⁵ Chíyeca, cha
 yobena nÿetsca tescama játsebacana ndëmuanÿenga
 chábeyeca Bëngbe Bëtsábioye tmojobeconá, er
 nÿetsca tescama cha echanjëftsiyena Bëngbe
 Bëtsábioye chëngbiana jtseimpadánama.

²⁶ Chcasna, Jesús ndegombre endmëna lempe
 ntšamo bënga imuajabotcá nda Bëngbe Bëtsábioye
 bëngbiana chabotseimpadánama, mo chë bëngbe
 bachnangbe más uámana amëndayacá. Cha sempre
 uamaná endmëna, ndocna te ni mo canÿe juabna
 ínÿabe contra yonjábomna, ainaniñe ndocna

bacna juabna yonjábomna, chë bacna soyënga amënguentshana luaroca mëná, y Bëngbe Bëtsá tojanma celoca más bëtsá y obená nyetscangbiana cha chaotsemnama. ²⁷ Cha ndoñe bonjanájaboto canye te y inye te bayënga jtsebánayana, Bëngbe Bëtsá chabe bacna soyëngama chaboperdonama y chë bacna soyënga entšanga tmojanmámna, mo chë inye bachnangbe más uámana amëndayënga mondbetsamcá, cachëngbiana y chë judiëngbiámna. Cha tojanma lempe ntšamo yojaniytcá canye soye y nyetsca tescama, entšanga bacna soyënga tmojanmama perdonánënga chamotsemnama. Cha chca tojanma, chabe derecho vida jtsobomñama cachcá tojanonýná ora; y tojanóbana entšanga chamotsobenama perdonánënga jtsemnama. ²⁸ Ntšamo Moisesbe leyinë yojanmandacá, chëngbiana mo chë bachnangbe más uámana amëndayëngcá tmojanëbuáyana entšanga inye ora bacna soye amënga; pero Bëngbe Bëtsá cabá chë ley entšangbe cucuatšinë tojanáboshjonentsana baytese, cha chabe Uaquiñábioye chë bachnangbe más uámana amëndayacá tbojanábuayana, cachabiana jajúrase, ntšamo tojanayancá ndegombre chaotsemnama. Bëngbe Bëtsá tojanma chë Uaquiñá chaotsemnama lempe ntšamo entšanga tmojtsajabotcá, nda cháuatsebacama, ndocna te bacna soye ndamá, ni ainaniñe bacna juabnënga ndbomná.

8

Cristo, nda jóbanëse tojanma entšanga Bëngbe

Bëtsáftaca mo canýacá chamotsemnama

1 Chë más uámana soye ndayama bënga montsichamo, chë Cristo mo bachnëcá yomnama montsoyebuambná ora, entsemna: Bënga chábeñe imojtsebomna canýa nýetsca tescama Bëngbe Bëtsabe delante bëngbiana impadaná, mo chë bëngbe bachnangbe más uámana amëndayacá, Bëngbe Bëtsabe catsbioica yojtsetbemana jtsemándayama, y Bëngbe Bëtsá chë más uámana tbemanentše. ² Chë inýe bachnanga Bëngbe Bëtsabe bëts yebnentše tmojánamashjna chë “más uámana ca” uabaina luaroye, Bëngbe Bëtsabe delante jtsemnama; pero chë luare celoca ndayentše nýets tempo Cristo mo chë bachnangbe más uámana amëndayacá yoservena, entšanga ndoñe chca tmonjanpormá, ndayá Bëngbe Bëtsá.

³ Nýetscanga chë bachnangbe más uámana amëndayënga tmojanëbuáyana, entšangbiana soyënga y tmojóba bayënga Bëngbe Bëtsábioye juatšëmbonama, chëngbe bacna soyëngama perdonánënga chamotsemnama; chíyeca, jtseytana Jesucristo ndayánaca chaotsebomnama, Bëngbe Bëtsábioye juatšëmbonama. ⁴ Cha quem luarentše tojtsetrabájase, cha ni mo bachna ndoñe nántsemna, er muentše ba bachnanga mondmëna, y chënga ba soyënga jamana Bëngbe Bëtsábioye jëtschuayama, ntšamo jamama Moisesbe leyíñe yomandancá. Y chca, ndoñe nantseyta cha chca chauatoservénama. ⁵ Chë inýe bachnanga imobomna luarënga Bëngbe Bëtsá jadórama, y ndaye soyëngaca chënga Bëngbe Bëtsá imoservena, ndoñe cachcá yontsemna chë

ndayentše Jesucristo celoca yoservena luarcá, ni ntšamo cha yoservencá; nýe batsatema bēngbioye šuinýanýná ntšamo chē celoca luare yomnama, ndayentše Cristo mo bachnēcá yoservena. Y bēnga mondētatsēmbo quem luarentše chē soyēnga chca yomnama, er chē Bēngbe Bētsábioye jadórama yebna, chē jatsjacama opodena yebna Moisés japórmama ora, Bēngbe Bētsá mēntšá tbojaniana: “Cuedado cochtsebomna chē atšbiana yebniñe nýetsca soyēnga jamama, ntšamo tcbonjaninýinýecá chacomama, chē tjoca bonjamna ora ca.” ⁶ Pero bēngbe bachnangbe más uámana amēndayá Cristo, tojashjache canýe más bēts trabajo jtsebomnama, ntšamo chē inýe bachnanga imobomna trabajuama; cachcá, ndayá Bēngbe Bētsá tojayancá Crísoftaca bēngbiana jamama, bēnga tempcá tšabá Bēngbe Bētsáftaca jtsemnama jtsamēse, puerte más tšabá endmēna, chē ndayá tempo chabe entšangbiana jamama tojanašebuachená soyama. Ntšamo mora cha tojayancá puerte más tšabá entsemna, er tojašebuachená más tšabe soyēnga bēngbiana jamama.

⁷ Chē Bēngbe Bētsá natsana tojanašebuachená soyēngaca matēnjanopodé entšanga chamot-samama ntšamo yojanamncá, ntšamo tojanašebuachenacá jójēngacñama, as ndoñe manjanēyta Bēngbe Bētsá cachiñe canýe trato chauátsbemama entšangbiana. ⁸ Pero Bēngbe Bētsá tojáninýe ntšamo yojanamncá entšanga ndoñe tmonjanmama, ntšamo cha tojanašebuachenacá jójēngacñama, y Bēngbe Utabná Bēngbe Bētsá

chëngbiamá mëntšá tojánayana:
 Canye tempo echanjóshjango, y chora Israel y
 Judabe pamillentša entsangbiamá básefta
 soyënga jamama chanjašebuachená,
 chënga átšeftaca tempcá tšabá jtsemnama
 chamotsobenama.

9 Chë chanjašebuachená soye ndoñe
 queochátsmäna cachcá ntšamo chë chëngbe
 bëts taitanga sënjanašebuachená soye
 enjamncá,
 atše chënga sënjanënatse ora, Egiptó luarocana
 sënjesanëbuacna ora;
 pero chëngna, ntšamo jamama enjanamncá,
 chë sënjanašebuachená soye jóyëngacñama
 ndoñe chemátanma causa,
 atše cachcá chënga sënjesanëñyaye ca, Bëngbe
 Utabná tojánayana.

10 Chë Israeloca entsangbiamá ndayá jamama
 canye tempo chentšana chanjašebuachená
 soye,
 mëntšá entsemna ca, Bëngbe Utabná tojánayana:
 Atše chanjama chë chëngbe juabniñe
 chaitsemánda soyama chënga chamotse-
 juabnama,
 y chamotseboše jtsamana ndayá chëngbe ainaniñe
 chaitsemánda soye.
 Atše chëngbe Bëtsá chántsemna, y chënga atšbe
 entsanga.

11 Chë tempo ndoñe queochátsiyta cányënga
 ínÿënga chamotsabuátambama,
 cachabe luariñe oyenábioye o cachabe pamil-
 lentša entsábioye, atše chë chëngbe Utabná
 chašmotsábuatmama.

Ndoñe queochátsëyta, er nyetscanga uámanënga y nduámanënga, corente tsabá atšbe šmochantsábuatma.

¹² Chënga chanjálastemaye y chëngbe bacna soyëngama chanjáperdonaye, y ndocna te más chë bacna soyënga chënga tmojamama quichátsjuabnaye ca —cha tojánayana.

¹³ Bëngbe Bëtsá, chë entsangbiana mora jamama tojásebuachenama tojtsichamo ora, chca jtsemnana, er cha tojama chë tempo entsangbiana jamama tojanašebuachená soye, mora ya ndoñe chaondëtsoservénama; ndayá mo tanguá soycá tojtsemna y ya ndoñe tontsoservena, chë soyna nyë batšatema más y ya jtsopochócana.

9

Bëngbe Bëtsá jadórama muentša luare y chë celoca luare

¹ Y morna, ndayá Bëngbe Bëtsá tojanašebuachenama y tojanmandá soyama, mandënga yojamna ntšamo cha jtsadoránama, y nya chabiana pormana yebnentše quem luarentše. ² Chiyeca, Bëngbe Bëtsá tojanmandá chaotsemna canye jatsjacama opodena yebna chábioye jadórama, mëntšá: Chë natsana tsañe quem Bëngbe Bëtsabiana yebnentše inauabaina “chë uámana luare ca”; chentše inamna chë canyësëfta quinÿenëfjuangá castellano candelerësiñe, y canye mesësha ndayiñe yojacjana chë luarentše Bëngbe Bëtsá bëtsemnama inÿinÿnaye tandëšënga.

³ Inye ujonÿana entsëjua chentšana, inye luare inamna; inauabaina “chë más uámana

luare ca”. ⁴ Chentše inamna chë castellano altar, incienso jajuinÿiyama, y chë cajontema nÿetsiñe castellanoca pormánëtema. Quem cajontema yojaninÿanÿná ntšamo Bëngbe Bëtsá tojanašebuachenacá, chë Israeloca entsanga chabe uámana entsanga yochjánabiamama, y inauabaina “Bëngbe Bëtsabe šbuachenana soye inÿinÿnaye cajontema ca”; y chë tsoye quem soyënga inabomna: canÿe castellano jarrëtema, maná ca uabaina tandëšeca, chë Bëngbe Bëtsá tojanma celocana chabe entsangbiamama chaótsatsama saná; Aaronbe varëfja, chë tojanantsëfjonëfja; y chë ndëtsbé tablëbenga ndayiñe Bëngbe Bëtsá tojanábema chë bnëtsana uámana mandënga. ⁵ Chë cajontema juatsboca imnamna chë juatëngmiáša uabomnënga, mo angelëngcá, “querubinënga ca” uabáinënga, y chënga imojaninÿanÿná chë Bëngbe Bëtsabe buashinÿinÿanana chéntšnaca bëtsemnama. Chënga, chë juatëngmiášhangaca chë cajontémentša nÿets ústonëtema imojanëtsbotsana; chë ústonëtema inauabaina “entsanga bacna soyënga tmojamama Bëngbe Bëtsá perdonaye luare ca”, er chentše, chë cajontema juatsboca chë bachnangbe más uámana amëndayá jtsamanana buiñe jabuëscjana, chë Bëngbe Bëtsábioye cha ibnaimpadana te, entsanga cháuaperdonama. Pero mora ndoñe quenátsiyta chë soyëngama lempe jatóyebuambnayama.

⁶ Lempe chca tmojanprontantšana, chë bachnanga sempre chë natsana luaroye imojánamashjuana, jamama ntšamo Bëngbe Bëtsá tojanamëndacá, chábioye jadórama. ⁷ Pero nÿe chë bachnangbe más uámana amëndayá

yojobena chë inÿe luaroye jamashënguana, y nÿe canÿe cada uata. Choye jamashënguama orna, cha ibojamna bayëngbe buiñe juabuyambana, Bëngbe Bëtsábioye juatšëmbonama, chca, chë bachnangbe más uámana amëndayá tojanma bacna soyënga Bëngbe Bëtsá chaboperdonama, y chë ntsetatšëmbcá entšanga tmojanma bacna soyëngnaca. ⁸ Chca, chë Uámana Espíritu jamana bënga chašósertama, chë natsana luare cabá tojtsemnëntscuana y chë bachnanga cabá chë soyënga chentše tmojtsamëntscuana, nÿetscanga cabá ndoñe tmonjanobená chë inÿe luaroye jamashjnama, chë “más uámana luaroye”. ⁹ Chë soyëngaca jtsopodénana bëngbioye jinÿanÿiyana, chë tempo, chë Bëngbe Bëtsábioye jadórama yebnentše entšanga uta luare imojábomna ora, ndoñe yonjopodena Bëngbe Bëtsabe delante nÿetscanga jatsmënana, mo chë bachnangbe más uámana amëndayacá. Y chë soyëngnaca jtsayanana, chë Bëngbe Bëtsabiama uátšëmbona soyëngaca y bachnanga tmojanóba bayëngaca, ndoñe tonjanopodé jamana canÿa Bëngbe Bëtsábioye adorayá, Bëngbe Bëtsáftaca tempcá tšabá chaotsatsmënana y Bëngbe Bëtsá chabe bacna soyëngama tbojaperdonama ainaniñe corente chaotsetatšëmbuama. ¹⁰ Chënga, chë uátšëmbona soyëngaca y tmojanóba bayëngaca tmojanma nÿe ntšamo Moisesbe leyinÿe yojanayancá, ndayá chiñe yojanlesenciancá, ndayá jasama o jofšiyama, y chë cuerpo jabebiana mo tšabe entšangcá Bëngbe Bëtsabe delante jtsatsmënana; nÿetsca mandënga nÿe cuerpama,

pero ainanama tondaye ntjamana. Pero chë entsanga chca yojánamna jtsamana, nÿe Bëngbe Bëtsá inÿe soyënga, más tsabe soyënga jamama tojamandantscuana, chë tsëm trato tojábema ora.

¹¹ Pero Cristo ya tojánabo, y cha yomna chë Bëngbe Bëtsabe delante bëngbiana impadaná mo chë bëngbe bachnangbe más uámana amëndayacá, chca, bëngbiana chaotsemnana chë tsabe soyënga ntšamo mochjoyëngacñëcá. Chë luare celoca ndayentše cha Bëngbe Bëtsabe delante mo bachnëcá yotrabája, puerte tsabe luare yomna, y chentše cha, ndoñe chë quem luarentše bachnanga imomnëngcá, cha yobena jamana lempe ntšamo Bëngbe Bëtsá entsangbiana jamama inajuabnaycá. Chë luare ndoñe entsangbe cucuátšeca yondëpormana, y chca jtsayanana, quem luarentša soye ndoñe yondmëna ca. ¹² Cha, canÿe y nÿetsca tescama chë luaroye Bëngbe Bëtsabe delante tojánamashëngo ora, cha ndoñe chivo o ternerbe buiñe tonjanabuyamba, ntšamo chë inÿe bachnanga imojuamancá; ndayá jóbänëse, chabe buiñe juabuáshanëse, cha tojanma entsanga atsebácanënga jtsemnana chamotsobenama; y chca tojanmëse, cha tojanobená chë luaroye Bëngbe Bëtsabe delante jamashënguama. Y Cristo chca choye tojanamashënguëse, tojanma bënga chë nÿetsca tescama yomna tsabe vida jtsebomnana chamotsobenama.

¹³ Ndëmuanÿenga ndayámnaca chë leyama tmojanoquedá mo chë Bëngbe Bëtsabe delante ndoñe tsábengcá, chë bachnanga imojuamana

chëngbioye toronga y chivëngbe buiñe jabuéscacjana, y chë altaroca tcojajuinýe tenerabe jatinyá chëngbioye jatbótotana, chca, chënga jábiamama Bëngbe Bëtsabe delante mo tšabengcá. Chca tmojamentšana, chë bachnanga tmojánayana chënga imojtsobena chë ínÿengaftaca jabama, Bëngbe Bëtsá jadórama, y cachiñe mo tšabengcá Bëngbe Bëtsabe delante imojtsatsmëna ca. ¹⁴ Ndayá bachnanga tmojanmcá yojanámana entšanga cachiñe mo tšabengcá Bëngbe Bëtsabe delante imojtsatsmëna ca jayanama; y chca, chë ínÿengaftaca Bëngbe Bëtsábioye jadórama tmojanobenase, jtsachetšá más yojtsámana Cristbe buiñe, ndémuanÿeye tojanábuashana bëngbiana cha tojanóbana ora! Chë nÿets tempo vida bomná Espíritbe obenánaca, Cristo, chabe derecho vida jtsobomñama cachcá tojanonýa y bëngbiana tojanóbana. Cha, chë ndocna bacna soye ndbomná, tojanóbana ora yojamna mo canÿe bayá tondaye ndbemaná chë bachnanga cuafjobacá juatšëmbonama, entšangbe bacna soyëngama; cachcá Cristo, chë ndocna bacna soye ndbomná, bëngbe bacna soyëngama jáperdonama tojanóbana. Bëngbiana tojanóbanayeca, Cristo yobena jamama bënga ainaniñe corente tšabá chamotsetátšëmbo, bacna soyënga bënga tmojamama, chë ndoñe vida jtsebomnama bënga junatsana soyënga, chama bënga perdonánënga imojtsemnama, y chca, bënga montsobena jtsiyenana, Bëngbe Bëtsá, chë ndegombre ainá yomná, jtseservënëse.

¹⁵ Chíyeca, Cristo jóbanëse tojama entšanga Bëngbe Bëtsáftaca cánÿiñe mo canÿacá

chamotsemnana, ntšamo Bëngbe Bëtsabe tsëm trato yomncá; y chca cha tojama, Bëngbe Bëtsá chabe entšanga chamotsemnana tojáchembënga perdonánënga chamotsemnana, chë Bëngbe Bëtsabe tempsca tratentša ley jtsocumplínama inamna ora imojoyenëntscuana bacna soyënga tmojanmama; y chëngnaca chamotsobenama chë nyetsca tescama mochtsebomna soyënga jóyëngacñama, ntšamo Bëngbe Bëtsá chabe entšanga tojanašebuachenacá.

16 Ntšamo canye testamentiñe tojtsayancá chaopasamna, jtseytana chaotsótatšëmbo chë chca jamama tojašbuachená cha tojóbanama. 17 Canye testamento tondaye ntsámanana, chë chca jamama tojašbuachená cha cabá ainá totsomñëntscuana; nya cha tojóbana orna aíñe. 18 Chiyeca chë Bëngbe Bëtsabe natsana trato, entšangbeñe tojanobojatšé, chora tmojanóba bayëngbe buiñe jabuéscjése. 19 Moisés chë leyentša nyetsca mandënga nyetsca entšanga tojánabuayenantšana, tojanca buángana boboshëshe y hisopo betiyentša buacuafja, chë ternerënga y chivëngbe buiñe búyeshca enajuabnyeyiñe tojanfchecuacuá, y chora chë leyënga librësañe tojanbuéscacja, y nyetsca entšangbeñnaca. 20 Y mëntšá tojánayana: “Quem buiñe entsinýinýná, ntšamo Bëngbe Bëtsá tojamandacá ndegombre yochtsemnana, y tšëngaftangbiana puerta yochtsámanama ca.” 21 Moisésnaca buiñe tojanbuéscacja chë jatsjacama opodena yebniñe, y lempe chentša soyënguiñe, chë ndaye soyënga Bëngbe Bëtsábioye jadórama yojanoserverna. 22 Er ntšamo leyiñe iuayancá,

yoytsemna n̄ya mo n̄yetsca soyēnguiñe buiñe jabuēscacjana, Bēngbe Bētsábioye jadórana t̄sabá chaoservema; y buiñe ndoñe tonjuábuashanēsna, ndoñe n̄tsopodénana entšanga bacna soyēngama perdonánēnga chamotsemnana.

Cristo jasúfriase y jóbanēse, tojanma entšanga bacna soyēngama perdonánēnga chamotsemnana

²³ Chíyeca jtseytana chē Bēngbe Bētsábioye quem luarentše jadórana soyēnga, chē bachnanga chamoma, Bēngbe Bētsábioye jadórana t̄sabá chaoservema, chē Bēngbe Bētsábioye jētschuayama tmojóba bayēngbe buiñeca. Chē soyēnga batsatema jtsin̄yan̄nayana n̄tsamo chē celoca luare yomnana Bēngbe Bētsabe delante, ndayentše Jesús yoservena. Lempe n̄tsamo chē Bēngbe Bētsábioye jadórana luarentše yomncá, chabe delante celoca, Jesucristo tojanma, chábioye jadórana t̄sabá chaoservema; pero chca tojanma más uámana soyēnga jamēse, chē tmojóba bayēngaca bachnanga quem luarentše inmētsama soyēngama.

²⁴ Er Cristo ndoñe tonjánamashēngo can̄ye luarentše Bēngbe Bētsá jadórana n̄ye entšangbe pormánentše, ndaye luare n̄ye batsatema jtsin̄yan̄nayana n̄tsamo chē celoca luare Bēngbe Bētsabe delante chábioye jadórana yomnana; ndayá cach celoye tojánamashēngo, Bēngbe Bētsabe delante luaroye, bēngbiana jtseimpadánama.

²⁵ Chē bachnangbe más uámana amēndayana chē “más uámana luaroye” jamashēnguana can̄ye cada uata, bayēngbe buiñeca, ndoñe cachabe buiñeca, chca, ndayánaca jamama entšanga bacna soyēnga tmojamama perdonánēnga

chamotsemnana. Pero Cristo chë luaroye celoca ndoñe tonjánamashëngo, chentsana jtésebocnana, y chabe buiñe juabuáshanëse cachiñe jatóbanana, y ba soye cachcá chauétsemnana. ²⁶ Chca tojtsemnëse, Cristbiana manjanmëna jasúfriana y jóbanana ba soye, chë Bëngbe Bëtsá quem luare tojanma orscana. Pero ntšamo tojopasacá entsemna, mora chë quem luare jopochócama tempo yojtsobeco ora, Cristo canye y nyetsca tescama tojenonÿinÿé quem luarentša entšanga bacna soyënga jabuajuánana, chëngbiana jóbanëse, mo entšangbe bacna soyëngama canye tmojóba bayá, Bëngbe Bëtsábioye uatšëmbonacá. ²⁷ Cachcá, ntšamo nyetsca entšanga jtsamnana nÿe canye jóbanana, y chentsana Bëngbe Bëtsá chëngbiana jayanana chë imojëftsiyenëntscuana ntšamo tmojanmcá tšabá o ndoñe tšabá bétsemnana, y chëngaftaca jamana ntšamo chora tojajuabocá, ²⁸ cachcá, Crístnaca, nÿe canye chabe derecho vida jtsobomñana cachcá tojanonÿá, chabe buiñe juabuáshanëse jóbanana, ba entšanga bacna soyëngama jáperdonama; y chentsana cachiñe yochjésabo, ndoñe bacna soyëngama entšanga jabáperdonama, ndayá chë cha cháuesabana tša tmobátmanënga jabátsebacama.

10

¹ Chë Moisesbe leyentša mandënga, ntšamo chë bachnanga yojánamnama Bëngbe Bëtsá jadórama tmojóba bayëngaca y inÿe soyëngaca, ndoñe ntsinÿanÿayana lempe chë Bëngbe Bëtsá chabe entšanga jatšatayana puerta tšabe soyënga, pero aíñe batšatema jtsinÿanÿayana ntšamo

chë soyënga yochtsemnama. Chíyeca chë mandënga, chë uátšëmbona soyëngaca y Bëngbe Bëtsábioye jadórama tmojóba bayëngaca, ndocna te ntjopódiana jamana chë Bëngbe Bëtsábioye jobéconama tmojtsebošënga, chca soyënga tmojtsamama cada uata nÿets tempo, chënga ainaniñe corente chamotsetatšëmbuama chëngbe bacna soyëngama nÿetsca tescama perdonánënga imojtsemnama. ² Er ndayá tcojtsamama Bëngbe Bëtsabiana uátšëmbona soyëngaca y chábioye jëtschuayama tmojóba bayëngaca, entšanga Bëngbe Bëtsábioye adórayënga, chabe delante tšábenga jtsemnama matmënjanobenase, chënga chë bacna soyënga tmojanmama ainaniñe ngménaca ya ndoñe mamënjétsemna, y matmëntsanajbaná soyënga amana chë tmojóba bayëngaca. ³ Pero juatšëmbonama entšanga bayënga tmojóba ora, josérviana entšanga bacna soyënga tmojamama cada uata chamuatenójuaboma; ⁴ er chë toronga y chivënga tmojóbanëngbe buíñeca ndoñe ntsopodénana entšángbioye bacna soyënga jabuajuánama.

⁵ Chíyeca, Cristo quem luaroye tojánabo ora, Bëngbe Bëtsábioye mëntšá tbojaniana: Ndoñe tconjábošena entšanga chacmátšëmbona soyënga, ni tmojobaye bayënga, pero aíñe tcojama atše canÿe entšacá chaitsemnama.

⁶ Ndoñe tšabá quecmátinÿana chë tmojóba y tmojajuinÿé bayënga, entšanga bacna soyëngama chacotsaperdonama.

⁷ As atše Bëngbe Bëtsá sënjaniana: “Bëngbe Bëtsá, muentše sëntsemna,

ntšamo aca icobošcá atše chaimama,
ntšamo acbe uabemana palabrenguiñe atšbiamama
endayancá, chë ndayá atše chjanmama ca.”

⁸ Natsana, Cristo tojánayana, Bëngbe Bëtsá ndoñe tonjánbošena, ni tšabá tbonjanínynana entšanga chamuátšëmbona soyënga, ni Bëngbe Bëtsábioye jëtschuayama tmojóba bayënga, ni tmojóba ni tmojajuinýé bayënga, entšanga bacna soyëngama cha chaotsaperdonama ca, masque chënga chë Bëngbe Bëtsábioye jadórama soyëngaca jamana, ntšamo leyiñe iuayancá ndayá chënga jamama yojtsamna. ⁹ Y chentšana, Cristo Bëngbe Bëtsábioye tbojátaniyana: “Muentše sënjabo, chë ntšamo aca icobošcá atše chaimama ca.” Chca, Cristo tojinýanyé chë jtsamana soyënga tmojóba bayëngaca, tondaye yonduámama entšanga bacna soyënga jabuajuánama, y entšangbe bacna soyëngama jóbanëse tojaninýanyé chë ntšamo Bëngbe Bëtsá yobošcá jtsamana, más iuámama chë inýe soyënga játamama. ¹⁰ Bëngbe Bëtsá tojama, bënga chabe entšanga y chabe delante tšábënga chamotsemnana, ntšamo Bëngbe Bëtsá yobošcá Jesucristo tojánmayeca, chabe derecho vida jtsobomñama cachcá jonýayëse y entšangbe bacna soyëngama jóbanëse, canýe y nýetsca tescama.

¹¹ Judiëngbe nýetsca bachnanga nýets tempo ba soye altarentša natsanoica Bëngbe Bëtsá jtseservénana, y ba soye cachcá jtsamana tmojóba bayëngaca, pero chë soyëngaca ndocna te ntjopódiana entšanga bacna soyënga jabuajuánama. ¹² Pero Jesucristo entšangbe bacna soyëngama tojanóbana ora, yojamna mo canýe tmojóba bayacá, Bëngbe Bëtsá entšanga

bacna soyëngama cháuperdonama; nÿe canÿe y nÿetsca tescama chca tojanma, y chentsana Bëngbe Bëtsabe catsbioica tojtanoítbema, canÿe uámana puestentse, jtsemándayama. ¹³ Chentse cha yobátmana, Bëngbe Bëtsá chabe obenánaca Cristbe uayayënga chabe cucuatshiñe chamoquedama yochjamëntscuana. ¹⁴ Er nÿe canÿe, entsangbe bacna soyëngama cruzoca jóbanëse, Jesucristo lempe tojama, entsanga chë Bëngbe Bëtsábenga jtsemnama chëmbonënga, chabe delante nÿetsca tescama tšabengcá chamotsemnama. ¹⁵ Y Uámana Espíritnaca, Bëngbe Bëtsabe uabenana palabrënguiñe šontsinÿanÿná chca ndegombre bëtsemnama, mëntšá tojánayana ora:

¹⁶ Ndayá entsangbiama chjama, canÿe tempo chentsana chanjašebuachená soye mëntšá entsemna ca, Bëngbe Utabná tojánayana:

Atse chanjama chënga chamotseboše jtsamana ndayá chëngbe ainaniñe chaitsemánda soye, y chamotsejuabnama chë chëngbe juabniñe chaitsemánda soyama ca.

¹⁷ Y chentsana mëntšá tojánayana:

Ndocna te más quichátsjuabnaye chënga bacna soyënga tmojamama, y ntšamo atse stsebošcá contra soyënga chënga tmojamama ca.

¹⁸ Chcasna, Bëngbe Bëtsá nÿetsca tescama entsanga bacna soyëngama tojaperdoná ora, ya ndoñe ntjátsiytana inÿe soyënga más játamama, mo bayënga cuafjobaycá, entsanga bacna soyëngama perdonánënga chamotsemnama.

Sontsamna Bëngbe Bëtsábioye jtobéconana

19 Y chca, Jesucrístbeyeca catšátanga, Jesube buiñe tojanábuashanama y bēngbiana tojanóbanama, chábeñe jtsošbuáchiyēse, bēnga montsobena, tondayama ntjatauatjá Bēngbe Bētsabe delante jamashēnguama. 20 Bēnga montsobena jamashēnguama chē tsēm benachējana, Cristo bēngbiana tojamējana; cha nda inétsama chē nyetsca tescama yomna tšabe vida chamotsebomnama. Mo chē quem luarentše chē bachnangbe más uámana amēndayacá, chē ujonýana entšėjuaiana jamashēnguana chē “más uámana ca” uabaina luaroye, Bēngbe Bētsabe delante jtsemnama, cachcá, Cristo bēngbe bacna soyēngama mo entšacá tojanóbanayeca, bēngnaca montsobena Bēngbe Bētsabe delante luaroye jamashēnguama. 21 Bēnga mondbomna canýe bēts bachnangbe más uámana amēndayá, Bēngbe Bētsabe entšángbeñe jtsemándayama, y cha endmēna Jesús. 22 Chíyeca, Bēngbe Bētsá jaserviama ndegombre ainaniñe corente jtsebošēse, y chábeñe puerte jtsošbuáchiyēse, šontsamna Bēngbe Bētsábioye jobéconana. Ntšamo chē bachnángbioye buiñeca tmojanabuešcá, Bēngbe Bētsabe delante tšabengcá chamotsemnama cha jaserviama, cachcá, Cristbe buiñe juabuáshanēse y bēngbiana jóbaniñe, bēnga ainaniñe corente montsetátšēmbo Bēngbe Bētsá nyetsca tescama bēngbe bacna soyēngama šojtsaperdonama. Y bēnga bėjayeca uabainēngnaca mondmēna; chíyeca bēnga jtsobenana Bēngbe Bētsábioye chca jobéconana.

23 Bēnga šontsamna nyets tempo Bēngbe Bētsábeñe puerte jtsošbuáchiyana, y ndocna

te nÿe ndayámna játajbanana entsángbeñe ichámuana, chë Bëngbe Bëtsábeñe jtošbuáchiyëse bënga imobatmana soyënga cha yochjamama, er chë soyënga šojašebuachená cha, sempre jamana ntšamo tojayancá. ²⁴ Bënga šontsamna janguanguana ntšamo muatjobenaye añemo jenatšetayana, nÿetscanga jtsenbobonshánana, y ntšamo tšabá yomncá jtsamana; ²⁵ pero ndoñe quešnátamna játajbanana, Bëngbe Bëtsábioye jadórana enefjuanana mo Crístbeñe ošbuáchiyënga quetsomñecá, ntšamo báseftanga imojtsamcá. Chamna, nÿetscanga añemo mochtsenatšetnaye Cristo nÿets tempo jtseservénama, y más mora, chë ndayá imojtsonÿama, Bëngbe Utabná yochjésabama ya yojtsobecuama montsetátšëmbo ora.

²⁶ Er chë ndegombre soyëngama tšabá tmojátatšëmbonentsana y chë soyënga tmojoyeuná chentšana, bacna soyënga jtsamëse tmojtsiyena, nÿe chca jamama tmojtseboše causa, muattsaboté ndayá Cristo bëngbiana tojanmcá, bëngbe bacna soyëngama cha tojanóbana ora, y ya tondaye nántsemna ntšamo Bëngbe Bëtsá bënga jtsaperdónama. ²⁷ Y chca, ndayá bënga muattsobena jobátmana soye nántsemna nÿe chë Bëngbe Bëtsábiocana castigo, chë ndayama šojtsamna uatjana jtsebomnana; y nÿe jobátmana chë tempo, ndaye ora Bëngbe Bëtsá puerte etonaná chabe uayayënga bëtscá íñesheca yochtsapochóca. ²⁸ Ndánaca chë Moisesbe leyama tojayana tondaye yondoalena ca, y útata o únganga chca tmojouena y aíñe cha chca tojayana ca chënga tmojayanëse, jtsemnana chë entsábioye

jtsóbana, tondaye ntjalastemacá. ²⁹ Canya, nyets ainánaca Bëngbe Bëtsabe Uaquiñábioye tbojtsaboté; y tojayana Cristbe buiñe, chë ndémuanýeye tojanábuashana bëngbiana tojanóbana ora, tondaye yonduámama ca, ndayá nyë ndaye entsabe buiñcá ca, chë buiñe chë ndémuanýeye šojtsinýanýná ndayá Bëngbe Bëtsá tbojašebuachenacá bëngbiana jamama, y ndáyeca Bëngbe Bëtsá chabe entsanga šojábiana, cha jasérviana; chë entsá Uámama Espíritbioye tbojóyenguango, nda inétsama bënga tšabe soyënga chamotsebomnama; y canya chca amá, ¿tšëngaftanga ndoñe šmontsejuabná cha ibojtsomerecena Bëngbe Bëtsábiocana canýe puerte más uabouana castigo, chë Moisesbe leyama tondaye yondovalena ca tojayanabiana? ³⁰ Bënga nyetscanga mondétatšëmbo Bëngbe Bëtsá mëntšá tojánayanama: “Atše chanjama chënga chamosufrima, ínýenga chamosufrima tmojama causa; y chënga chanjácastigaye, ínýengbioye bacá tmojaborlá causa ca.” Y mëntšánaca tojánayana: “Bëngbe Utabná chabe entsangbiana echanjayana ntšamo tmojëftsemcá tšabá o ndoñe tšabá bétsemnama, y chëngaftaca echanjama ntšamo chora chaojajuabocá ca.” ³¹ ¡Tša uabouana, Bëngbe Bëtsá chë nyets tempo ainabe cucuatšinë joquédana, castiganá jtsemnama!

³² Pero ntšamo tempo yojamnama šmochtsenójuabnaye, chë ndegombre soyënga Jesucristbiana cabá chora šmonjanábuatmana ora, y chora tša jenujuérsana cmonjanotocá padecena soyënguñe, y chë causa tša šmojansufrí. ³³ Báseftanga tšëngaftanguentsëngbioye entsangbe

delante tcmojanoyáguango, y ínÿenga tmojanma
puerte chašmotsesufrínama; y ínÿenga
tšëngaftanguentsënga chca imojansufrinëngaftaca
šmojanama, chënga jujabuáchama. ³⁴ Tšëngaftanga
šmojánalastemana chë chënguentsënga cárceloye
imojanëtámenënga; y oyejuayënga šmojanlesenciá
ntšamo šmojanbomncá ínÿenga chacmotsaba-
cama, er tšëngaftanga šmojátatšëmbona Bëngbe
Bëtsábiocana más tšabe soyënga šmojtsebomnama,
chë nyetsca tescama šmochtsebomna soyënga.

³⁵ Chcasna, ndoñe šmatjajbaná ainaniñe bëtscá
añemo jtsebomnana, ni Bëngbe Bëtsábeñe sempre
jtsobátmanana; er chca šmobatmánayeca, Bëngbe
Bëtsá echanjama tšëngaftanga bëtscá uacanana
soyënga chábiocana chašmotsebomnama.

³⁶ Tšëngaftanga cmontsamna corente uantadënga
jtsemnana, padecéniñe chašmojtsachnëjuana
ora, chca, ntšamo Bëngbe Bëtsá yobošcá
tšëngaftanga chašmotsamama, y ndayá Bëngbe
Bëtsá tojanašebuachenacá chašmóyëngacñama.

³⁷ Er Bëngbe Bëtsabe uabemana palabrenguiñe cha
mëntšá tojánayana:

Betsco, ndoñe bën, y chë jabama ibomná echan-
jabo.

Ndoñe bën quebochatóbema.

³⁸ Nÿe chë ndabiama atše chajjama atšbe bom-
inÿiñe tšabia chaotsemnana,

átšbeñe cha betsošbuáchema, cha ndegombre
chë nyetsca tescama yomna tšabe vida
echántsebomna;

pero uatjana causa, átšbeñe ošbuáchiyana
tojtsajbanase, atše cháftaca ndoñe

quichátoyeuaye ca —cha tojánayana.

³⁹ Pero bēnga ndoñe quemátsmēna chē uatjana causa Bēngbe Bētsábeñe ošbuáchiyana tmojtsajbananga, y chca, n̄yetsca tescama pochocánēnga jtsemnama imojtsajnēnga; pero aīñe mondmēna chē Bēngbe Bētsábeñe ndegombre ošbuáchiyēnga, y chca, chē atsebácanēnga jtsemnama mochjashjáchēnga.

11

Bēngbe Bētsábeñe ošbuáchiyana jtsebomnana

¹ Ošbuáchiyana jtsebomnana endmēna corente jtsetatsēmbuana, ndayá tmojtsobatmancá ndegombre chca yochjopásama; endmēna ainaniñe corente jtsetatsēmbuana, ndayá bēnga mora ndoñe tmontson̄yáca ndegombre chca yomnama. ² Bēngbe Bētsá tojánayana bēngbe bēts taitanga tšabá imojánama ca, chēnga chábeñe imojtsošbuachéyeca.

³ Bēnga, Bēngbe Bētsábeñe mondošbuachéyeca, mondētatsēmbo cha quem luare y n̄yetsca luarēnga tojanmama, chca chaotsemnama cha tojanmandá ora; chcasna, chē ndayá mora bēnga jin̄yama imobencá, cha tojanma bēnga ndoñe mondobena jin̄yama soyēnguentsana.

⁴ Abel Bēngbe Bētsábeñe yojanošbuachéyeca, oveshatēmēnga chábioye tbojanátšēmbona, y chē soye Bēngbe Bētsabiama más tšabá yojtsemna, chē ndayá Caín, chabe catšata, Bēngbe Bētsá jētschuayama tbojanátšēmbonama. Chíyeca, Bēngbe Bētsá tojánayana Abel chabe bominjīñe tšabia yojtsemna ca, ndayá Abel chábioye jētschuayama

tojanmcá oyejuayá tojanóyengacñeyeca. Ntšamo Abel Bëngbe Bëtsábeñe yojanošbuachecá, masque cha ya obaná yojtsemna, chë soye cabá bënga šontsabuatambá.

⁵ Enoc Bëngbe Bëtsábeñe puerte yojanošbuachéyeca, Bëngbe Bëtsá celoye tbojesanbétšeñe, ntjobancá. Chentšana ndocná tonjanobená cha jtsinýenana, Bëngbe Bëtsá tbojesanbétšeñe causa. Y Bëngbe Bëtsabe uabemana palabrënguiñe endayana, Bëngbe Bëtsá Enócraftaca oyejuayá canjamna ca, ntšamo jtsamëse yojoyenama, y chentšana celoye tbojtsanámbañe. ⁶ Pero Bëngbe Bëtsábeñe ntsošbuachiyá, ndoñe quenátopodena cha oyejuayá bëngaftaca jabemama, er chábioye jobéconamna, entšá jtsemnana jtsošbuáchiyana cha ndegombre bétsemnama, y cha inétsamama chë cha jtsabuatomama tša tmobošëngbiamama bëtscá tšabe soyënga chamotsebomnama, mo chábioyana uacanana soyëngcá.

⁷ Bëngbe Bëtsá Noébioye tbojanbuayená uabouana soyënga yochjanopásama, cachora ndopodena jinýama soyënga, y cha Bëngbe Bëtsábeñe yojanošbuachéyeca, tojanma ntšamo Bëngbe Bëtsá tbojanmandacá y barquësha tojanapormá chabe pamíllanga játsebacama. Cha chca tojanma ora, ošbuáchiyana bómnyayeca, cha tojaninýanýé entšanga tša bacna soyënga tmojanmama y chë causa castigánënga jtsemnama yojtsamnama. Chabe ošbuachiyanámnaca Noé tojánashjache Bëngbe Bëtsabe bominýiñe tšabia jtsemnama, y chca entšá jashjáchana, nýe Bëngbe Bëtsábeñe jtsošbuáchiyëse.

8 Běngbe Bětsá Abrahámbyoye tbojanchembo, inye luaroye cháuama; Abraham Běngbe Bětsábeñe yojanošbuachéyeca, tojanma ntšamo Běngbe Bětsá tbojanmandacá, y tojánbocna chě luaroye jama, chě Běngbe Bětsá tbojanšbuachená jatšetayama luaroye, masque Abraham ndoñe yontsetátšēmbo ndēmoye yochjánama. 9 Běngbe Bětsábeñe yojanošbuachéyeca, yojobena mo inye luarocana ashjanganacá jtsiyenana, cachabe luarentše ndoyená, chě Běngbe Bětsá tbojanšbuachená luarentše. Entšějuaca pormana tamběnguiñe yojoyena, cachcá ntšamo chě chábentšana básenga Isaac y Jacob ibojěftsiyencá; y chátnaca Abrahamcá ibojanobátmana jójěngacñama ntšamo Běngbe Bětsá Abrahámbyoye tbojanšbuachenacá. 10 Er Abraham corente uantadá yojanobátmana chě canye luaroye celoca jamashěnguama tempo; chě luare inamna canye běts pueblo, puerte tšabe ucuatjoniñe pormana pueblo, canye luare chě ndayentšama Běngbe Bětsá tojanjuabó ntšamo chaotsemnana, y cachabe pormana luare inamna.

11 Sara, Běngbe Bětsábeñe yojanošbuachéyeca, Běngbe Bětsá tojanma cha canye šešona chabot-sebomnana, masque chora ya bětsanánějema yojtsemna, šešona jtsebomnana. Běngbe Bětsá chca tojanma, er Sara corente yojanjuabná, cha chě canye šešona yochtsanbomnana tbojanšbuachená cha, nýets tempo ntšamo tojayancá amá yojamna ca. 12 Y chca, quem entšá Abraham, chě šešonga jtsabamnana ya ndobenábentšana, ba básenga tmojanonýná, tša mallajta mo chě celoca estrellěngcá, y tša

chěftanga mo chě mar bėjayoca chěnyañentša cascajá, ndocná jacúntama ntjobenayana.

¹³ Njetsca quem entsanga imojětsiyena jtsaměse ntšamo chěngbe ošbuáchiyana yojamncá, y chca tmojanóbana, masque cabá ndoñe tmonjanóyěngacñe chě Běngbe Bětsá tojanašebuachená soyěnga. Pero chěngbe ošbuachiyánama corente imojtsetátšěmbo, Běngbe Bětsá chentšana baytese ntšamo tojanašebuachenacá yochjánatsatayama y chě soyěnga ndegombre yochtsemnama, y chama oyejuayěnga chěnga imojtsemna. Chěnga tmojánayana quem luarentše chěnga imojyena mo cachěngbe luarentše ndoyeněngcá, y quem luarějana mo nje achnějuaněngcá ca. ¹⁴ Y chca tmojtsicháměngna, puerte jtsinjanynayana chěnga tša imojtseboše inje luaroca joyéanama, canje luare cachěngbiana. ¹⁵ Chěnga nje chě ndayentšana tmojětsanbocna luarama manjánjuabnase, matměnjnobená tšabá cachoye jesshěconama. ¹⁶ Pero chěngna canje más tšabe luare innaboše, canje luare celoca. Chíyeca Běngbe Bětsá ndoñe yonjaněuatja, chěngbe Bětsá ca chěnga chamotsechembuanama, er celoca canje běts luare, mo canje běts pueblěcá chěngbiana tojanprontá.

¹⁷ Běngbe Bětsá Abrahámbyoye jinjama, ndegombre aíñe o ndoñe Běngbe Bětsábeñe tayojsanošbuachema, tbojanmandá chabe uaquiñá Isaac chabuánatse jóbama, chábbyoye jětschuayama, ntšamo Abraham chě tojóba bayěngaftaca jamama yojanamancá. Cha Běngbe

Bëtsábeñe yojanošbuachéyeca, yojtseprontana chë nÿe canÿe uaquiñá ibnabomná jóbama, Bëngbe Bëtsábioye jëtschuayama, masque Bëngbe Bëtsá mëntšá tbojanšbuachená: ¹⁸ “Chë ácbentšana entšanga nÿe Isaacbiajana mochanjabo ca.” ¹⁹ Abraham corente yojanjuabná y yojátatšëmbo, Bëngbe Bëtsá ndegombre obenana bomná bëtsemnama, chë obanënga chámuatayenama jamama. Chíyeca, Bëngbe Bëtsá Abrahámioye tbojtsanauyaná Isaac jóbama ora, yojamna mo Abraham obanënguentšana chábioye cuaftoyëngacñécá. Y chca, ntšamo Isaácaftaca tojanopasacá, batšá yojtsinÿanÿnaye ntšamo Jesucrísoftaca yochjanopasacá.

²⁰ Isaac Bëngbe Bëtsábeñe yojanošbuachéyeca, Bëngbe Bëtsábioye tbojanimpadá chabe uaquiñátbiana, Jacob y Esaú, bëtscá tšabe bendicionënga chabotsebomnama, chë joshjanguama tempënga ora.

²¹ Jacob Bëngbe Bëtsábeñe yojanošbuachéyeca, ya jóbanama ora, tbojanimpadá cada ona chë Josebe básengbiana, Bëngbe Bëtsá chaoma bëtscá tšabe bendicionënga chamotsebomnama. Cha chca tojanma, jotsejbénase Bëngbe Bëtsábioye jadórama, y chabe jatjonëfjiñe tsbanánoca jojuáchase.

²² José Bëngbe Bëtsábeñe yojanošbuachéyeca, ya jóbanama ora, tojánayana más chcoye chë Israeloca entšanga Egiptó luarentšana mochjëftsanbocna ca, y tojëftsanmandá ndayá jamana chabe óbana cuérpoca.

²³ Moisesbe bëtšëtsata Bëngbe Bëtsábeñe

ibojanošbuachéyeca, cha tojanonýná ora, unga shinýentscuana cha tmojtsaniytême, er chata tbojáninýe cha canýe botamana básetema bétsemnama, y ndoñe tbonjanëuatjaná chë reybe mandama, chë nýetsca judiëngbe basetémënga boyabásetemënga jtsëbáyana.

²⁴ Moisés Bëngbe Bëtsábeñe yojanošbuachéyeca, ya bëtásá yojtsemna ora, ndoñe tonjánbošena chë Egiptoca reybe bembëbe uaquiñacá chamotsábuatmama. ²⁵ Chamna, tojánbošena cha jasúfriama ínýenga chamotsamama, cánýiñe chë Bëngbe Bëtsabe entsángaftaca, y ndoñe nýe baseftayté tšabá jatsmënana, bacna soyënga jtsamëse, ntšamo cachá tojtsejuabnacá, nýe cachá tšabá jtsomñama. ²⁶ Chamna, cha yojanjuabná, chë padecena soyënguiñe jasúfriana ntšamo Cristo tojansufriacá, más tšabá yojamna chë Egiptoca uámama soyëngama, er cha Bëngbe Bëtsábeñe jtsošbuáchiyëse chábeñe yojanobátmana, ba tšabe soyënga mo canýe uacanana soycá cha ibochjanatšetayama.

²⁷ Bëngbe Bëtsábeñe yojanošbuachéyeca, Moisés Egiptocana tojëftsanbocna, chë luarentša rey cháftaca chábuetnama ntjatauatjca. Cha ainaniñe nýets tempo añemo yojtsebomna, y chca yojáninýna mo chë ndocná jinýama tondobenacá, Bëngbe Bëtsábioye cuaftsonýacá. ²⁸ Bëngbe Bëtsábeñe yojanošbuachéyeca, ntšamo Bëngbe Bëtsá tbojanmandacá, Moisés chë judiënga tojanabuayená Bashco fiesta jamama, y chë Israeloca entsángaftaca yebnëngoye amashjuaniñe buiñeca tojanbuéscacja, chca, chë ángel obanayá,

chë Israeloca pamíllangbeñe Egiptoca chë mayor uaquiñënga ndocá chaondámama.

²⁹ Moisés y Israeloca entšanga Bëngbe Bëtsábeñe imojanošbuachéyeca, chë “Buángana ca” uabaina mar bejayëjana tmojánenachnëngo, mo chiñe bojojo fshantse cuaftsomñcá; chentšana, chë Egiptoca entšanga cachcá jamama tmojánbošena ora, nyetscanga chiyiñe tojtsanatajo.

³⁰ Israeloca entšanga Bëngbe Bëtsábeñe imojanošbuachéyeca, chë Jericó bëts pueblentša tapiëšënga shëconana canÿsëfta tentscuama chënga imojánajnentšana, chëšënga yojtsáshajaye.

³¹ Rahab, chë pueblentša bacna vida bomna shembása, Bëngbe Bëtsábeñe yojanošbuachéyeca, ndoñe tonjanóbana chë ínÿengaftaca, chë bëts pueblentse oyenënga, chë ntšamo Bëngbe Bëtsá tojanmandacá ndoñe tmonjanmënga; y ndoñe tonjanóbana, er chë Israeloca entšanguentšana ichmónënga tšabá tojanëbuaja, chë jarrepárama tmojánanga ntšámose chë luarentse oyenënga jáyënjanama jobenayama.

³² Atše sentsobena bangbiamá más jóyebuambayama, Bëngbe Bëtsábeñe ošbuáchiyëngbiamá, pero luare šattsëshbe chcangbiamá jóyebuambayama, mo Gedeoncá, Barac, Sansón, Jefté, David, Samuel y Bëngbe Bëtsabe juabna oyebuambayëngcá. ³³ Chënga Bëngbe Bëtsábeñe imojanošbuachéyeca ínÿengbe mandadëngbe entšángbioye tmojanayëñaná, bëtscá imojánama nyetsca entšángaftaca ntšamo tšabá yomncá jtsamama y nyetscanga cachcá chamotsámanama, ndayá Bëngbe Bëtsá

chënga tojanašebuachenacá tmojanóyëngacñe; y Bëngbe Bëtsá tojanma chënga leóngaca imojtsemna ora, chënga chamuatenáyebengoma, chentšana báseftangbioye ndocá chamondámama. ³⁴ Ošbuáchiyana bómnyeca, Bëngbe Bëtsá tojanma lempe chaotsefsanama, chëngbioye íñeshiñe tmojanacjá ora, chënga ndocá chamondëpasama; tmojanotsbocá espadējaca jobanámentšana; ya tondaye añemo béntsebomna ora, Bëngbe Bëtsá tojanma bëts obenana y puerte añemo chamotsebomnama; tmojánashjache bëts obenana jtsebomnama ínÿenga jáyënjanama, chëngaftaca imojtsentsjaná ora; y tmojanobená inÿe mandadënga y chëngbe soldadënga jáyënjanama, chamotsachetama jamëse. ³⁵ Ošbuáchiyana bómnyeca, básefta shembásënga chëngbe óbana pamíllangbioye cachiñe ainënga tmojtananÿe, chënga ainënga chamotsatsmënama Bëngbe Bëtsá tojanma ora.

Ošbuáchiyana bómnyeca, ínÿenga tmojanma básefta ošbuáchiyënga, puerte chamosufrima, y jobanámnaca; er chënga más tmojánbošëna jashjáchana chë nÿetsca tescama yomna tšabe vida jtsebomnana, y ndoñe nÿe chë jótsbocana batšatema más vida jtsebomnama. ³⁶ Ošbuáchiyana bómnyeca, ínÿenga corente tmojansufrí, ínÿenga chëngbioye tmojanoyánguango ora y tmojanatsetšená ora; y ínÿenga tmojansufrí y cárceloye cadenëjuangaca utámenënga joquédamnaca. ³⁷ Inÿengbioye ndëtsbéngaca tmojtsanatëchënganja, serruchëshaca tmojtsanëjátcacaye, espadējaca tmojtsanëbaye.

Inyenga imojánajna cányentsana ínycnoye nye oveshá y chivébe bobáchecha uichétjonenga, ujabótenga, ainana tsetšanenga, y ínycngbeyeca mocá borlánenga. ³⁸ Chè nye quem luarama enójuabnayenga ndoñe monjanomerecena chënga mëngaftaca jtsiyenama, chënga chë vida imojábomna cányentsana ínycnoye aniñe, entsanga ndoyena luarënguenache, tjañenache, fshantsiñe atëbëfjniñe y cuevëshënguiñe.

³⁹ Nyetsca quem entsanga, ndëmuanyëngbiamu muentse tmonjoyebuambá, Bëngbe Bëtsá tsábá chëngbiamu tojánayana, ošbuáchiyana imojánbomna ca; pero ni canya chënguentsá tonjanóyëngacñe, ndayá Bëngbe Bëtsá chëngbe entsanga jatsatayama tojanašebuachenacá, nyetsca tescama jtsebomnama. ⁴⁰ Bëngbe Bëtsá, bëngbeñe jtsejuabnayëse, tojanjuabó canye más tsabe soye bëngbiamu jamama, chca, Bëngbe Bëtsá canye ora jamama, bënga nyetscanga, chënga y bënga chamotsemnama lempe ntšamo Bëngbe Bëtsá yobošcá, ntšamo Bëngbe Bëtsá tojanašebuachenacá jóyëngacñese.

12

Bënga mochtsejuabnaye ndayá Jesús tojanmama

¹ Chíyeca, bënga mochtsejuabnaye ba entsangbiamu, chë bëngbiamu más natsana imojaniyenenga, ndëmuanyënga puerte tsábá bënga jtsinýanýnayanu ntšamo ndegombre yomnana Bëngbe Bëtsábeñe ošbuáchiyana jtsebomnana, mo chënga ndayá bënga tmojtsamama cuaftsonyángcá. Chcasna, mo chë tmochamanëngcá, ínycngaftaca jenëyëñjanama,

chë jashjanguama tojtsemna luaroye natsana jashjanguama, chënga jotjajuamna, chë chorscama nduaserverna entšayá jtsenátsejcana, y lempe ndayá tojtsama más uenana chamotjajuama soyëgnaca jtsenójacana; bëgnaca cachcá, ndoñe matjaleséncia bënga Crístbioye ndoñe tšabá ndëtsoservénama, ni chë bacna soyënga jamama juabnënga, chë bëngbioye paselo jáyënjanama juabnënga cachcá chamotsamama. Chamna, šontsamna sempre Bëngbe Bëtsá jtseservénana, puerte uantadënga jtsemnëse masque padecena soyënguiñe tmoyena, bënga chamobená chë trabajo jamama, chë ndayama Bëngbe Bëtsá šojáchembo. ² Jesusbiana mochtsejuabnaye, nda šuebënatsana bënga ošbuáchiyana chamotsebomnana, y šuinÿanÿná ntšamo nÿets tempo nÿetsca soyënguiñe Bëngbe Bëtsábeñe jtsošbuáchiyama. Cha chë cruzoca jóbanama sufrínana lempe tojanoboyá, er cha yojanobátmana chë chentšana yochtsanbomna bëts oyejuayánama; y yojanjuabná, chë más bacá uamana entšangcá jóbanana, chabiana ndoñe canÿe uámana soye yonjamna ca; y chentšana chë uámana puestentše tojtanoítbema, Bëngbe Bëtsabe catšbioica, jtsemándayama.

³ Chíyeca, šmochtsejuabnaye ntšamo Jesús Bëngbe Bëtsábeñe jtsobátmanëse, puerte uantado yojamnama, chë bacna soye amënga corente chabe contra imojtsemna ora. Chca chábeñe šmochtsejuabnaye, tšëngaftanga Crístbiana oservéniñe ndoñe chacmondëumantšema, ni ainaniñe añemo jtsebomnana ndoñe chašmondájbanama. ⁴ Tšëngaftanga padecena

soyënguiñe šmojachnëngo, entšanga bacna soyënga imojtsama causa, pero mëntscoñama ndoñe cmontsamna jóbanama, Cristbe soyëngama enojuerzániñe; ⁵ y tcmojtsébnëtjomba ndayá Bëngbe Bëtsá tšëngaftangbioye, chabe básenga quetsomñecá tcmojábuayenama. Chë Bëngbe Bëtsabe uabemana palabrenguiñe mëntsá endayana:

Atsbe uaquiñá, Bëngbe Utabná aca jábuayenama tojtseboše ora, aca jasúfriase y padecena soyënga jauántase,

chora ndoñe catjátsjuabnaye chiñe mo canye nduámana soye cuaftsemncá;

y cha chacmojuácacana ora, ndoñe cattsajbaná ainaniñe añemo jtsebomnana.

⁶ Er Bëngbe Utabná jábuayenana nda cha tbobobonshanábioye,

yjacastígana chë mo chabe uaquiñacá tbojofjábioye ca —chiñe endayana.

⁷ Padecena soyënguiñe chašmojtseufrina ora, šmochtsejuabnaye chë soye yojtsemna tšëngaftangbioye jábuayenama, y chca, Bëngbe Bëtsá tšëngaftangaftaca jtsamana mo chabe básenga quetsomñecá. ¿Nderado nántsemna canye uaquiñá, y chábioye chabe taitá ndocna te buanjuácacana, más tšabá chaotsamama? ⁸ Nderado Bëngbe Bëtsá tšëngaftanga ndoñe tcmonjabuayená, ntšamo nyetsca chabe básengaftaca cha endbetsamcá, as tšëngaftanga ndoñe ntsemnana ndegombre chabe básenga. ⁹ Y bënga básenga monjamna ora, bëngbe bëtsétsanga quem luarentše monjanamana bënga jácastigana, y bënga chëngbioye ndoñe

stëtšoye ntjaquédana. Y mora, bēnga más šontsamna, jtšobedecénana y más bēts respeto jtšebomnana celoca Bēngbe Taitabiama, nda tojama entšanga espíritu chamotšebomnana, y chca, bēnga tšabe vida chamotšebomnana. ¹⁰ Bēngbe bētsétsanga quem luarentše, nŷe básefta tescama, bēnga jēftsabuayiynayana, y chca jamana chēnga tšabá tojtsinŷana ora; pero Bēngbe Bētsá bēnga šojtsabuayiyná ora, sempre chca jtšamana bēngbe tšabiama, bēnga chabe entšanga jábiamama, cachacá puerte tšábenga, ntšamo cha nŷets tempo yomncá. ¹¹ Sempre bēnga ndaye castigo tmojtšebomna ora, chora bēnga chama ndoñe oyejuayēnga ntsemnana, pero aíñe cochtsetšenánēnga. Pero bēnga chē castigüentsana tmojuatsjinŷe ndayá Bēngbe Bētsá chē sóyeca tbojtsabuayiynacá, as chentšana jóbocnana natjēmbana oyenana, nŷetsca soyēnguiñe ntšamo tšabá yomncá jtšamēse.

Bēngbe Bētsábioye jtšabotena, entšangbiama ndoñe tšabá ntsemnana.

¹² Mo nda puerte uamēntšnayacá, jatrabájama tondaye añemo ntjtšebomncá, tsátšena buacu-atšéngaca y puerte uamēntšena ntsamiašéngaca, tšēngaftangbentše báseftanga ya uamēntšnayēnga šmojtsemna Bēngbe Utabnabiama trabájajyiñe, y ainaniñe ndoñe añemo šmontšebomna. Cachiñe bēts añemo šmochtishache, y Bēngbe Bētsabe obenana cachiñe šmochtsatsbomna. ¹³ Mo chē canŷe benache tšabá y ndericho chaotsemnana tmojtsamēngcá, chca, chē coshetēnga chiñe jama

chamotsobenama y más tšabá jtsatanama chamu-atatsjínŷama, y chë benachentsana ndoñe chamondëtsebocanama; cachcá tšëngaftanga, chë bëtscá ošbuáchiyana y Cristo jaserviama corente añemo šmobomnënga, chë nŷe batšatema ošbuáchiyana y chca jatrabájama nŷe tondaye añemo ndbomnënga šmochjújabuache; chë soye šmochjama, ntšamo Cristo tšabá jaserviama yomncá jinŷanŷiyëse, y nt-jalesenciácá ndocna soye chaotsama chë tšabe benachentsana tšëngaftanga chašmotsojuánañama.

¹⁴ Lempe ntšamo chašmojobenacá šmochjama nŷetscángaftaca natjëmbana jtsiyenama, y ntšamo Bëngbe Bëtsabe entsanga mondbetsamcá jtsamëse chašmotsiyenama, cha jtseservënëse; er chca ntjamcá, canŷa ndoñe ntsobenenana Bëngbe Utabnábioye jinŷama. ¹⁵ Yejuana šmochtsantješna, ndocná Crístbeñe ošbuáchiyana chaondëtsajbanama, y chca, chë Bëngbe Bëtsá chabe entsángbioye yochjatšataye tšabe soyënga chënga ndoñe chamondashjache. Smochtsantješna, tšëngaftanguentšë ndocná chaondëtsemna, mo canŷe untja tbëtëjácá, chë chcaja sayëngbioye jásocayana, nda chaotsama, ínŷenga natjëmbana ainana ndoñe chamondëtsebomnama y bacna soyënga jtsamëse chamotsiyenama. ¹⁶ Yejuana šmochtsantješna ndocná tšëngaftanguentšë shembása o boyabásaftaca bacna soye amá chaondëtsemnama, ni canŷa ndabiamana Bëngbe Bëtsabe soyënga tondaye chaondëtsámana. Esaú chca tojanma, chë lempe yochjanashjachcá, mayor uaquiñá bëtsemnama, chabe uabentsábioye canŷe šcena sanama tbojtaname ora. ¹⁷ Y

tšëngaftanga šmondétatšëmbo, chca tojanopasá chentšana, Esaú tojánbošena chabe taitá Bëngbe Bëtsábioye chaboimpadama, chabiamama tšabe bendicionënga chaomama, chë mayor uaquiñá bétsemnama yojanobena jtsebomnama soyënga; pero chora chabe taitá ndoñe tbonjanoyeuná, er masque Esaú chora juabna tojantrocá, cha ndoñe tonjanobená ntšamo yojtsopasancá jëtsjandmanana. Masque cha tša tojánbošena, shëchbuíyeca chabe taitábioye jaimpádase, ya ndoñe yontsopodena ntšamo tojanopasacá jëtsjandmanana.

¹⁸ Tšëngaftanga ndoñe chešmatobecná, mo chë entšanga Israeloca Sinaí ca uabaina tjoye tmojanobecnacá, ndayá chënga imojobena jabojuama, y íñesheca yojtsángbototjuana, tondaye binýniñe luare, tša ibetiñe y puerte jabuache binýiëngaca; ¹⁹ ni chešmatuena chëngcá, canye trompetéjua uajatëtanana, ni Bëngbe Bëtsabe oyebuambnayana. Chë oyebuambnayana tmojanuenënga, imojtseimpadana ndoñe más chëngbioye chaondëtsóyebuambnama. ²⁰ Chca tmojanma, jauántama ndoñe tmonjanobená causa, ntšamo Bëngbe Bëtsá tojanamëndacá:

“Nda quem tjoca chaojoyená, masque canye bayá chaotsomñe, entsemna chana ndëtsbéngaca chamotsatëchënjanga jtsóbama ca.”

²¹ Ndegombre, ntšamo tmojaninýcá tša uabouana yojtsemna, cach Moisésnaca mëntšá tojánayana: “Tša šontsengmëmná auatjananá sëntsemna causa ca.”

²² Pero tšëngaftanga Bëngbe Bëtsábioye šmojobecná, y chca endmëna mo tšëngaftanga

canÿe Si3n ca uabaina tjoye celoca cuafjobeconacá, chë Bëngbe Bëtsá nyets tempo vida bomnabe bëts puebloye, mo celoca Jerusalén cuenta; y ba uaranga angelëngbioye šmojobeconá, cánÿiñe oyejuayënga enefjuanënga imojtsemnëngbioye, Bëngbe Bëtsá jtsatschuanayama. ²³ Endmëna mo tšëngaftanga chë Bëngbe Bëtsabe entšángbioye cuafjobeconangcá, chentše enefjuanënga mo Bëngbe Bëtsabe basengcá, chënga ndayá chë Taitá tojašebuachenacá j3yëngacñama, ndëmuanÿënga Bëngbe Bëtsá chabe librëšañe tojúbiamama. Tšëngaftanga šmojobeconá Bëngbe Bëtsábioye, ntšamo nyetsca entšanga tmojamcá tšabá o ndoñe tšabá bëtsemnama yochjayanábioye. Endmëna mo tšëngaftanga cuafjobeconacá, chë entšanga mora ya obanënga y ntšamo tšabá yomncá jtsamëse imojëftsiyenëngbe espiritëngbioye, chë entšanga ndëmuanÿëngbiama Bëngbe Bëtsá tojanma chamotsemnama lempe ntšamo chabe entšangbiama yojanjuabnacá, chca, cháftaca sempre vida jëftsebomnama. ²⁴ Tšëngaftanga Jesúsbioye šmojobeconá, chë jóbanëse, entšanga Bëngbe Bëtsáftaca mo canÿacá chamotsemnama tojanmá, ntšamo Bëngbe Bëtsabe tsëm trato yojamncá; y endmëna mo chë bëngbiama cha tojanóbana ora tojanábuashana buiñoye tšëngaftanga cuafjobeconacá; chca tojanábuashana, bëngbioye Bëngbe Bëtsabe delante mo tšabengcá jábiamama, mo ntšamo entšángbeñe buiñe jabuéscacjama chë bachnanga imojuamancá. Caín chabe catšata Abélbioye tbojanóba ora, yojamna mo

chë Abelbe uabuáshanana buiñe Bëngbe Bëtsábioye cuaftseimpadancá, chë bacna soyama castigo chaotsemnana; pero Jesucristbe buiñe ndoñe chca ntsamana, ndayá chíyeca bënga más tsabe soyënga jashjáchana; Jesusbe buiñeca, bënga montsobena atsebácanënga jtsemnana.

²⁵ Cuedado šmochtsebomna, bëngbioye tojtsoyebuambná ora cha joyeunayama. Chë Israeloca entšanga ndoñe tmonjánbošena Bëngbe Bëtsá joyeunayama, chë Sinaí tjoca quem luarentše tojanabuayená ora; chëngbioye cha tojanacastigá. Y mora más, Bëngbe Bëtsá, chë celocana bënga abuayiynayá, ndoñe cachcá ndëcastigánënga quešochátabashejuana, ntšamo cha šojtsëtsësnacá ndoñe tmontseyeunanëse.

²⁶ Bëngbe Bëtsá Sinaí tjoca chë entšángbioye tojanoyebuambá ora, chabe oyebuambnayánaca tojanma quem luare chauangmëmanama, pero mora cha chabe uabemana palabrënguiñe tojašebuachená: “Atše cachiñe chanjatsma chauangmëmanama, ndoñe nÿe quem luare, sinó celócnaca ca.”

²⁷ Bëngbe Bëtsá “cachiñe ca” tojánayana ora, chë sóyeca yojtsichamo, chë ndayté lempe chaongmëmanama cha cachiñe yochjama ora, chë quem luarentše tmojama soyënga y chë jatrócama yopodena soyënga yochtsejuána ca, chca, nÿe chë nÿetsca tescama yomna soyënga y ndoñe jatrócama soyënga chaoquedama.

²⁸ Chcasna, Bëngbe Bëtsabe amëndayoca, chë cha yochjama bënga chamuamashënguama luare, yomna cachcá nÿetsca tescama y ndocna te ntjotrócana. Bëngbe

Bëtsá chama mochjëtschuaye, y ntšamo cha tšabá tbojtsinÿancá mochtsadorana, chabiamá bëtsá respeto jtsebomnëse, y nÿetscangbiama más bëtsá cha yomnama jtsejuabnayëse. ²⁹ Er Bëngbe Bëtsá puerte etonaná chë chabiamá nduauenanënga jabuache echanjácastigaye, y chca, cha jtsemnana mo canÿe íñeshe lempe jtsepochoamcá.

13

Ntšamo jtsiyenama, Bëngbe Bëtsá oyejuayá bëngaftaca chaotsemnama

¹ Sempre nÿetscanga šmochtsenbobonshana, Jesucristbeyeca catšátanga quetsomñecá. ² Sempre tšabá chë tšëngaftangbe yebnoye inÿe luarëngocana tmojáshjajnënga šmochjúbuaja, er chca jamëse, ntsetatšëmbcá báseftangna angelënga chëngbe yebnentšë tmojanëbuaja.

³ Chë utámenëngbiama sempre šmochtsenójuabnaye, mo tšëngaftángnaca chëngaftaca utámenënga cuaftsemncá. Chë ínÿenga tmojtsama chamotsesufrinëngbiama šmochtsenójuabnaye, er tšëngaftángnaca nderado cachcá šmatjatspása.

⁴ Boyabása y shembása tbojanobouamá ora, ntšamo tbojanensbuachenacá nÿetscanga chamotserrespetana; y chë útata chabotsama nÿe ndayá y nÿe ntšamo Bëngbe Bëtsá bouamnátbioye tojanamëndacá, er Bëngbe Bëtsá echanjácastigaye chë shembása o boyabásaftaca bacna soye amënga, y chë shema o boyábíoye ínÿaftaca ingñayëngnaca.

⁵ Ndoñe šmattsiyena jtsejuabnayëse nÿe mallajta crocénana jëftsebomnama. Nÿe chë

šmobomna soyëngaca oyejuayënga šmochtsomñe, er Bëngbe Bëtsá tojánayana: “Ndocna te cachcá quebochatonÿaye, ni canÿa quebocháiseboshjona ca.” ⁶ Y chca, bënga montsobena corente añémoca jayanama:

Bëngbe Utabná endmëna nda atše
šonduájabuachana; tondayama
quichátauatja.

¿Ndayá canÿe entšá nanjobenaye átšeftaca jamama ca?

⁷ Tšëngaftangbe amëndayëngbiana,
chë Bëngbe Bëtsabe buayenana
soyënga tcmojábuatambangbiana, sempre
šmochtsenójuabnaye. Sempre šmochtsenójuabnaye
chë ntšamo chënga imojaniyenentsana
tojanóbocna tšabe soyëngama, y šmochtsiyena
jtsamëse ntšamo chënga imojanamcá,
Jesucrístbeñe ošbuáchiyënga bëtsemnama.

⁸ Jesucristo cachá nÿets tempo iuëtsemna, tempo, mora y nÿetsca tescama. ⁹ Ndoñe šmatjaleséncia ínÿenga chamotsamama tšëngaftanga chë benachentsana chašmotsojuánañama, ndayá chënga tmojtsabuátambama, y chë Cristo tojánabuatambama contra soyëngaca. Más tšabá endmëna bënga ainaniñe añemo jtsebomnana, Bëngbe Bëtsá tšabe juabna bëngbiana yobómnayeca, y ndoñe chë sanama, chë ndayá aiñe o ndoñe šontsamna jtsesayana soyëngama mandënga tcojtsamëse. Chca mandënga ndocna te chë Israeloca entšangbiana tempo tonjanoservé.

¹⁰ Bënga chë Jesucrístbeñe mondošbuáchenga, canÿe soye mondbomna mo chë Bëngbe Bëtsábioye jëtschuayama altaroca juinÿena soycá, bacna

soyëngama perdonánënga jtsemnama. Bënga mondbomna chë Jesucristo bëngbiana tojanma soye, cruzoca tojanóbana ora, bëngbe bacna soyëngama; y chë nÿe tmojóba bayëngaca soyënga tmojtsama bachnanga ndoñe ntsebomnana, chë Cristo tojanóbana ora, ndayá tojanmentšana tojanóbocna tšabe soyënga. ¹¹ Er chë judiëngbe más uámána bachnangbe amëndayá, chë tmojóba bayëngbe buiñe chë “más uámána ca” uabaina luaroye juabuyambana, Bëngbe Bëtsá entšangbe bacna soyëngama cháuperdonama, y chë bayëngbe cuerpënga jtsejuinÿiyana entšanga tmoyena luarentšana chaboca. ¹² Cachcá, Jesúsna tojansufrí y tojanóbana bëts pueblentšana chaboca, chabe buiñe tojanábuashana ora jóbanëse, entšanga Bëngbe Bëtsábënga chamotsemnama, y chabe delante mo tšabengcá chamotsemnama. ¹³ Chíyeca bënga šontsamna Jesúsbioye jobéconana, nda entšanga tmojtsanaboté y bëts pueblentšana chaboca tojanóbana. Cha mochjuasto, y ntšamo cha tojansufricá bëngnaca mochjasúfria. ¹⁴ Er quem luarentše bënga ndoñe quemátsbomna canÿe bëts pueblo bëngbiana, nÿets tempo chauesomñe bëts pueblo, ndayá bëngna tša mondboše y puerta mondobátmana bënga joyéanama chë celoca yochtsemna Bëngbe Bëtsabe bëts pueblentše. ¹⁵ Chíyeca, šontsamna sempre Bëngbe Bëtsábioye jtsatschuanayana, Jesucristbiajana. Bëngbe Bëtsá chca tmojtsadorana ora, jtsemnana mo chábioye jëtschuayama canÿe soye cuafjuatšëmboncá. Chcasna, jtsóyebuambnayëse cha mochtsadorana. ¹⁶ Sempre ntšamo tšabá yomncá šmochtsama,

y chë šmобomncá inyengbiámnaca chaotsemna. Chca šmochtsama, er chca tcojama ora, Bëngbe Bëtsá oyejuayá jtsejuabnayana chca chabiamama tcojama ca, y jtsinynana bënga Bëngbe Bëtsá imojtsatschuanama, ndayá cha tojamama.

¹⁷ Sempre šmochtsama ntšamo chë tšëngaftanga ošbuachiyëngcá enefjuanëngbeñe amëndayënga tmojayancá, y sempre šmochtsiyena jtsamëse nye ntšamo chënga tmojtsebošcá. Chënga sempre tšëngaftangbioye jtsanÿenana, tšëngaftangbe tšabiamama, ntšamo cmojánanÿenama Bëngbe Bëtsábioye jojuama yojsamnama chënga jtsetatšëmbëse. Jtsayaunanëse, šmochjama chënga chëngbe trabajo oyejuayánaca y ndoñe ngménaca chamotsamama, er ndoñe chca šmonjamëse, chë trabajo tšëngaftangbe tšabiamama ndoñe nántsemna.

¹⁸ Bëngbe Bëtsá bëngbiamama šmochtseimpadana, er bënga ainaniñe corente fsëndëtatšëmbo tšabá tifjamama, y tša fsëntseboše jtsiyenana ntšamo tšabá yomncá lempe jtsamëse.

¹⁹ Tšëngaftanga bëtscá cbontsaimpadana, Bëngbe Bëtsá chašmoimpadama, atše chašolesenciamama tšëngaftangaftaca cachiñe jtsatsmënama.

Bëngbe Bëtsábioye chëngbiamama jaimpádama y chënga jacheuayama

²⁰ Atše, Bëngbe Bëtsá sëntseimpadana, cha chë nda endbétsama bënga natjëmbana chamotsiyenama, y nda tojanma Bëngbe Utabná Jesús cháuatayenama, nda bënga šondánÿena mo oveshëngbe tšabe abujëñÿacá; y Bëngbe Bëtsá chca tojanma, Jesús, chabe buiñe juabuáshanëse tojanóbanayeca, chca,

entsanga jinÿanÿiyama ndegombre bétsemnama ntšamo Bèngbe Bètsá chabe entsangbiana tojanašebuachenacá nÿetsca tescama jamama.

²¹ Cha sèntseimpadana chaoma tšèngaftanga chašmotsebmnama nÿetsca tšabe soyènga ntšamo cmojtsèjabotcá, chca, lempe ntšamo cha yobošcá tšèngaftanga chašmotsamama; y cha Jesucrísoftaca chaboma bèngaftaca ntšamo cha tšabá tbojtsinÿancá. ¡Nÿetscanga nÿetsca tescama Cristo chamotsatschuaná! Chca chaotsemna.

²² Jesucrístbeyeca catšátanga, tšèngaftanga cbontsaimpadana, jábuayenama ntšamo tcbonjauyancá, puerte uantádoca tšabá chašmóyèngacñama, er nÿe básefta palabréngaca chama tcbonjubuábiana. ²³ Atše sèntseboše tšèngaftanga chašmotsetátšëmbo, Timoteo Jesucrístbeyeca bèngbe catšata, ya ndoñe utamená yontsemnama, y cha betesco átšbioye chaojtabèse, átšeftaca chanjèftsbetše tšèngaftanga jányama chaijá ora.

²⁴ Tšèngaftanga ošbuachiyèngbeñe nÿetsca amèndayènga šmochjácheuaye, y nÿetsca Bèngbe Bètsabe entsàngnaca choca. Chè Italia luaroquènga ošbuáchiyènga tšèngaftanga cmontsacheuaná.

²⁵ Atše, Bèngbe Bètsá sèntseimpadana, cha chaoma tšabe bendicionènga tšèngaftangbeñe chaotsemnama.

**Bëngbe Bëtsa Cabëngaftaca Entsoyebuambna
New Testament in Camsá**

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Camsá

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

